

Daniel

Daniel quiijcuilo ni amatlapohuali ipan nopa tonali quema nopa israelitame itztoyaj ipan Babilonia imaco se tlanahuatijquetl tlen ax quiixmatqui TOTECO. Quihuicatoyaj Daniel tlen itlal quema eliyaya se tellocatl. Ica tonali, Daniel mochijqui se itlapalehuijca tlen más inechca nopa hueyi tlanahuatijquetl. Ica miyac tlanextili huan tlajtoli, Daniel quinyolchicajqui israelitame para ma quineltocaca TOTECO huan ma motemachica ipan ya para quinmanahuiqui. Quinilhui para se tonal quintzontlamiltiqui inincualancaitacahua huan quicuaultlalis inintlal. Nojquiya TOTECO quimacac Daniel tlanextili tlen sesen nopa huejhueyi tlanahuatijcayotl tlen motlalanase para tlanahuatise ipan ni tlattepectli huan teipa ica tonali huetzise.

Daniel qui piya ome partes:

Daniel 1 – 6 Daniel huan ihuampoyohua mochijque tetique iixpa nopa fiero tlanahuatijquetl.

Daniel 7 – 12 Nopa miyac tlanextili tlen TOTECO quimacac Daniel

Daniel 7 Nopa nahui fiero tlapiyalime

Daniel 8 – 9 Nopa tlanextili tlen se oquich borrego huan se chivo

Daniel 10 – 11 Nopa tlayolmelajquetl tlen elhuicac

Daniel 12 Itlamiya tonali ipan tlattepectli

Babilonia ehuan quintlanque tlali Judá ehuan

1 Ipan nopa tonali quema Tlanahuatijquetl Joacim yohuiyaya ica eyi xihuitl tlanahuatis ipan tlali Judá, hualajqui Tlanahuatijquetl Nabucodonosor tlen tlanahuatiyaya ipan tlali Babilonia. Yajaya ajsico ipan tlali Judá ininhuaya isoldados, huan quiyahualoque altepetl Jerusalén huan pejqque quitehuáj. **2**Huan Toteco Dios quicahuili Tlanahuatijquetl Nabucodonosor ma quitlani Tlanahuatijquetl Joacim. Nojquiya Toteco Dios quicahuili ma quiixtequi sequin tlamantli tlen quitequihuiyayaj ipan ihueyi tiopa. Huan quihui-caque nopa tlamantzitzi tlatzejtzeloltique huan quitlalitoj ipan nopa cali campa mocajque inintlaixcopincayohua ipan altepetl Sinar huan nopano quiajcojqque ica sequinoc tlamantzitzi pajpatiyotl tlen iniacaxa ininteteyohua.

3Nojquiya Tlanahuatijquetl Nabucodonosor quiilhui Aspenaz tlen quinyacana-yaya itlapalehuijcahua para ma quintlapejpenica sequin israelita telpocame tlen itztoyaj ininconeuhua tlanahuatiani o tominpiyani huan ma quinhualicaca hasta tlali Babilonia. **4**Ma quintlapejpenica telpocame tlen tejtetique huan cuali inintlachiyalis huan tlen tlanamiquij huan momachtijque miyac tlamantli. Ma quintlapejpenica tlen nimantzi huelis quichihua-se se tequitl huan tlen nochi quimachilíaj huan tlen quinitase para se tonali huelis quipalehuise nopa tlanahuatijquetl para tlanahuatis. Monequiyaya quinmachtise nopa telpocame nopa tlajtoli caldeo tlen quitequihuíaj ipan nopa tlali huan ma quinmachtica ipan nochi iniamatlapohual. **5**Huan Tlanahuatijquetl Nabucodonosor tlanahuati para ma quinmacaca nopa telpocame san se nopa cuali tlacualistli

huan tlaili queja tlen ya quitequiliyayaj. Quiijto ma quinmactica para eyi xihuitl huan quema quitlamiltise nopa eyi xihuitl, nopa telpocame quitequipanose.

**Daniel huan ihuampoyohua
ipan ichaj nopa tlanahuatijquetl**

⁶Huan ipan nopa israelita telpocame tlen quintlapejpenijque itztoyaj Daniel, Ananías, Misael huan Azarías tlen tlacatque ipan nopa hueyi familia Judá. ⁷Pero nopa tlayacanquetl tlen quinmocuitlahuiyaya quinpatili inintoca ica tocaitl tlen itlal Babilonia. Huan Daniel quitocaxtlali Beltsasar. Huan Ananías quitlalili Sadrac. Huan Misael quitocaxti Mesac huan Azarías quitocaxti Abed Negro.



*Nopa tlanahuatijquetl quintlapejpeni
nahui israelita telpocame.*

⁸Pero Daniel ipan iyolo motemacac para ax quicuas itlacualis huan itlailis nopa tlanahuatijquetl pampa nopa tlacualistli quichihuas ax tlapajpactic iixpa Toteco. Huajca Daniel quitlajtlani nopa tlayacanquetl ma quincahuili para ma ax quicuase nopa tlacualistli tlen ica quiixpanosquáj itlanahuatil Toteco.

⁹Huan Toteco Dios quichijqui para Daniel ma mohuica cuali ihuaya nopa tlayacanca tlapalehuijquetl huan yajaya quitlasojtlac miyac. ¹⁰Pero pampa yajaya eliyaya itlapalehuijca nopa tlanahuatijquetl, quiilhui Daniel:

—Ax nihuelis nimechmacas seyoc tlacualistli pampa niquimacasi nopa tlanahuatijquetl. Yajaya tlen tlanahuatijtoc tlachque monequi inquicuase huan inquisse. Huan intla ax inquicuase, huelis inixchipahuiyase. Huelis incocoxatiyase huan ax innesise cuali queja ne sequinoc

telpocame. Huan elis na notlajtlacol huan nopa tlanahuatijquetl tlanahuatis ma nechmictica.

¹¹Huajca Daniel quicamahui seyoc tlatl tlen nopa tlanahuatijquetl nojquiya quitlalijtoya para quimocuitlahuis ya huan quinmocuitlahuis Ananías, Misael huan Azarías. Huan Daniel quiilhui:

¹²—Nimitztlajtlanía se favor. Xitechyejyeco para majtactli tonali. Xitlanahuati san ma techmacaca quiltil para tijcuase huan para tiquise, san atl. ¹³Huan quema panotos ni majtactli tonali, ximomacas cuenta quejatza tiitztoque huan quejatza itztoque ne sequin telpocame tlen quicuaj itlacualis nopa tlanahuatijquetl. Huan huajca teipa huelis intechtlamacase ica tlen inquitase para cuali.

¹⁴Huan nopa tlatatl quiseli tlen quiilhui huan para majtactli tonali quintlamacac queja quiilhuijque para quinyejyecos. ¹⁵Huan quema ya tlantoya nopa majtactli tonali, yajuanti nesiyayaj más cuali huan quipiyayaj más chicahualistli que ne sequin tlen quicuayayaj nopa tlanahuatijquetl itlacualis. ¹⁶Huajca nopa tlatatl ayoc quinmacac nopa tlanahuatijquetl itlacualis huan itlailis. San quintequiliyaya quiltil.

¹⁷Huan Toteco Dios quinmacac nopa nahui telpocame miyac tlamatilistli huan miyac tlanamiquilistli. Nochi hueliyayaj quichihuaj. Quiixmatiyayaj huan quimachiliyayaj nochi tlamantli libros huan nochi tlamantli tlanamiquilistli. Nojquiya Daniel quimachiliyaya tlen quiijosnequi nochi tlamantli temictli huan tlanextili tlen tlacame quitaj. ¹⁸Huan quema ajsic nopa tonali tlen nopa tlanahuatijquetl quiixtlalijtoya para ma monextica nochi nopa telpocame iixpa, nopa tlayacanquetl tlen itlapalehuijcahua quinhuicac iixpa. ¹⁹Huan nopa tlanahuatijquetl quintlatzintoquili tlachque momachtijtoyaj. Huan ipan nochi nopa telpocame, ax quipanti niyon se queja Daniel, Ananías, Misael huan Azarías. Huajca quinthequimacac ma quipiyaca tequihuejcaoytl ipan itlanahuatilis. ²⁰Huan ipan nochi tlamantli tlen monequiyaya tlanamiquilistli, quintlatzinto-

quili huan quinpanti para yajuanti tlhuel tlanamiquij hasta quinonpano nochi se-quinoc tlanamiquini ipan itlanahuatilis. Huan quinpanti quimatiyayaj hasta majtactli hueltas más que ne tlanamijca tlacame tlen momachtijque sitlalime o quincamahuijque ajacame. ²¹Huan Daniel quipixqui tequihuejcaoytl ipan nopa tlanahuatistli para tlhuel miyac xihuít huan tequitic hasta ipan nopa achtohui xihuít tlen itlanahuatilis *Ciro*.

Nabucodonosor quipixqui se temictli

2 Quema Tlanahuatijquetl Nabucodonosor yohuiyaya ica ome xihuít tlanahuatía, pejqui quitemiqiy miyac tlamantli huan tlen quitemiqiyaya tlhuel quicue-solmacayaya huan teipa ayoc hueliyaya cochi. Huan tonaya ax hueliyaya quillnamiqui itemic. ²Huajca tlanahuati ma quinnotzatij nopa tlacame tlen momachtíaj sitlalime, huan tlen tetonalitaj, huan tlen tetlajchihuáj ininhuaya nochi tlanamijca tlacame. Quinejqui quiitas intla se tlen yajuanti huelis quiixtomilis itemic. Huajca nochi yajque monextitoy iixpa. ³Huan ne tlanahuatijquetl quinilhui:

—Nijpaxqui se temictli huan nelía nimosohua miyac pampa nijnequi nijmachilis. Huelis nechilhuía tlen nechajsis teipa.

⁴Huan nopa tlanamijca tlacame quilhuijque nopa tlanahuatijquetl:

—¡Tohueyitlanahuatijca! ¡Xiitzto miyac tonali! Xitechpohuili tlen tijtemijqui huan tojuanti, timotlatequipanojcahua, timixtixtomilise tlachque quinequi quijjtos.

⁵Huan nopa tlanahuatijquetl quinnanquili:

—Ya niquilcajqui tlen nijtemijqui. Pero intla ax intechilhuáj tlachque nijtemijqui huan tlachque quinequi quijjtos, nitlanahuatis ma inmechhuelocua huan ma quinxolehuaca imochajchaj. ⁶Pero intla innechilhuse tlachque nijtemijqui huan tlachque quinequi quijjtos, nimechmacas miyac regalos tlen cuali. Nojquiya nimechhueyitlalis huan inquipiyase más tequihuejcaoytl. Huajca xinechilhueica tlachque nijtemijqui huan tlachque quinequi quijjtos.

⁷Huan nopa tlanamijca tlacame sampa quinancuilijque:

—Quena, totlanahuatijca, xitechpohuili tlachque tijtemijqui, huan timitzilhuse tlachque quinequi quijjtos.

⁸Huan nopa tlanahuatijquetl quinilhui:

—Cuali nijmati inquinequij inquichiya-se hasta nechajsis nopa tlen fiero quijjtos-nequi nopa temictli pampa ya inquicactoque tlen niqijito. ⁹Intla ax innechilhuse tlachque nijtemijqui, san se tlatzacuilitlistli imopantis huan ya nopa miquistli. Pampa niqita inmoilhuijtoque san sejco quejatza innechnanquilise ica itlacayotl hasta ajsis nopa tlamantli. Huajca xinechilhueica nopa temictli huan nijmatis para temachtli inhuelij innechixtomilise tlen quijjtosnequi notemic.

¹⁰Huan nopa tlanamijca tlacame quilhuijque nopa tlanahuatijquetl:

—Axaca ipan ni tlattepectli huelis mitzilhuis tlen tijnequi tijmatis, titotlanahuatijca. Nojquiya axaca niyon se tlanahuatijquetl o tlayacanquetl, yonque nelía hueyi itlanahuatilis tlajtlantoc se tlamantli quej ni para ma quilhui se tlen momachtía sitlalime, o tlen tetonalitaj o tlen tlanamiquij. ¹¹Pampa tlen ta titechtlajtlanilía nelía ohui. Axaca ipan tlattepectli huelis mitzilhuis. Huelis se dios mitzilhuisquía, pero yajuanti ax moca-huaj campá titlacame.

¹²Huan quema nopa tlanahuatijquetl quicajqui ni tlen quijjtoque, nelía cualanqui huan tlanahuati ma quinmictica nochi tlanamijca tlacame ipan tlan Babilonia. ¹³Huan quema itlayolmelajcahua nopa tlanahuatijquetl tematitliyayaj nopa tlanahuatili, quitemotoj Daniel ihuaya ihuampoyohua para quinhuicase quinmictitij.

Daniel quitlajtlani Toteco itlapalehuil

¹⁴Huan ajsito campá Daniel nopa tlayacanquetl tlen soldados tlen itoca Arioc tlen quipixqui itequi para temictis quema nopa tlanahuatijquetl quinequiyaya. Huan Daniel moilhui quejatza quichihuasquía huan teipa quicamahui Arioc ica miyac tlanamiquilistli. ¹⁵Huan Daniel quitlajtlani nopa tlayacanquetl:

—¿Para tlen nopa tlanahuatijquetl quichijtoc ni tlanahuatili tlen nelchicahuac?

Huajca Arioc quipohuili Daniel tlen oncac. ¹⁶Huan Daniel yajqui nimantzi campaitztoya nopa tlanahuatijquetl huan quihui ma quimaca se ome tonali para huelis quipohuilisquía itemic. Huan nopa tlanahuatijquetl quiseli tlen quijto. ¹⁷Huan teipa Daniel yajqui ichaj huan quinitato ihuampoyohua, Ananías, Misael huan Azarías. ¹⁸Quinilhui ma quitlajlanica Toteco Dios tlen itztoc elhuicac para ma quintlasojtla huan ma quinnexili ni tlamantli tlen axaca quimati para ma axquinmictica ininhuaya ne sequin tlanamijca tlacame ipan tlali Babilonia. ¹⁹Huajca ipan nopa tlayohua Toteco Dios tlen itztoc elhuicac quimacac Daniel se tlanexili huan quinexili nopa tlamantli tlen axaca quimatiyaya.

Daniel quitlascamatqui Toteco

Huan yeca Daniel quitlascamatqui Toteco Dios tlen itztoc elhuicac, ²⁰ica ni tlajtoli:

“Toteco Dios, ma mitzhueyichihua nochi tlacame para nochipa, pampa ta tijpiya nochi tlanamiquilistli huan chicahualistli. ²¹Ta tijpatla tonali huan xihuitl. Tiquinjicuenía huan tiquintlálía tlanahuatiani. Ta tlen tiquinmaca inintlalanamiquilis tlen tlanamiquij huan tlen tlamachilíaj. ²²Ta tlen tite nextilía tlamantli tlen ohui para quimachilise huan tlen motlatijtoc. Tijmati tlen eltoc ipan tzintlayohuilotl. Tlahuili pehua ipan ta. ²³Nimitztlascamati, ta tiToteco Dios, tlen notatahua mitzhueyichijque. Nimitztlascamati huan nimitzhueyichihua pampa tinechmacatoc tlanamiquilistli huan chicahualistli. Huan ama tinechmatiltijtoc tlen timitztlajtlanijque. Titech nextilijtoc tlen quimacayaya nopa tlanahuatijquetl hueyi cuesoli.”

Daniel yajqui iixpa Nabucodonosor

²⁴Huan teipa Daniel yajqui quitato Arioc tlen nopa tlanahuatijquetl quitequimacatoya para ma quinmicti nochi tlanamijca tlacame ipan tlali Babilonia. Huan Daniel quihui:

—Amo xiquinmicti nopa tlanamijca tlacame. Xinechhuica iixpa nopa tlanahuatijquetl huan na niquixtomilis nochi itemic.

²⁵Huan Arioc moisihuili para quihucas iixpa Tlanahuatijquetl Nabucodonosor huan quihui:

—Totlanahuatijca, ipan nopa israelitame tlen tiquinhualicaque tlen tlali Judá, na nijpantijtoc se tlatatl tlen huelis mitzixtomilis tlachque quijtosnequi motemic.

²⁶Huajca nopa tlanahuatijquetl quinzotzqui Daniel tlen nojquiya itoca Beltsasar huan quijto:

—¿Huelis tinechiluis tlachque nijtemijqui huan tlachque quinequi quijtos?

²⁷Huan Daniel quinancuili:

—Axaca niyon se tlen huili mitzilhuis motemic tlen tijnequiyaya tijmatis yonque yajaya se tlanamijca tlatatl, o se tlen tetonalita, o se tlen tetlajchihuía, o se tlen momachtía sitlalime. ²⁸Pero, quena, itztoc se Dios nepa elhuicac tlen tenexilía tlamantli tlen tlacame ax quimachilíaj. Huan Tlanahuatijquetl Nabucodonosor, yajaya mitzmatiltijtoc tlen panos teipa. Huajca ama nimitzpohuilis nopa temictli tlen tijpizqui huan nochi nopa tlanexili tlen ti quitac quema ticochtoya. ²⁹Quema timo tectoya, pejqui timoilhuía tlen panosquía teipa. Huan yajaya tlen tematilía tlen motlatijtoc mitzmatiltijtoc tlen panotiyas teipa. ³⁰Ax nechmatiltijtoc nopa tlamantli pampa más nitalnamiqui que ne sequinoc tlacame. Nechnexilijtoc para huelis nimitzixtomilis tlachque quijtosnequi motemic, huan para queja nopa huelis tijmachilis tlen timoyolilhuyaya.

Nabucodonosor itemic huan tlen quijtosnequi

³¹“Totlanahuatijca, ipan motemic ti quitayaya moquetztoya moixpa se tetyotl nelhueyi huan nelía huejcapantic. Huan tlahuyaya nopa teteyotl huan mitzmatimati. ³²Itzonteco nopa teteyotl eliyaya senquistoc oro. Huan iyolixco huan ima eliyaya plata. Huan iijti huan imetzto-

huiya eliyaya bronce. ³³Huan icotztla eliyaya tlen hierro. Huan iicxihua canactzi eliyaya hierro huan canactzi eliyaya soquitl. ³⁴Huan quema noja tijtlachiliyaya, se tetl quisqui ica iselti tlen campa eltoya ipan se tepetl. Huan momajcajqui nopa tetl huan quiajsic ipan imetz nopa teteyotl campa eliyaya hierro huan soquitl, huan quitlamixolejqui. ³⁵Huan ipan san se tla- lochtl huetzqui nochi nopa hierro, soquitl, bronce, plata huan oro. Huan mochijqui queja tlaltejpoclti queja quema ti- quita ipan tonali quema tlatotonia huan tlacame quihuetequij trigo huan se ajacatl quihuica itlasolo. Huan ax tleno mocajqui tlen nopa teteyotl. Pero nopa tetl tlen qui- maquili nopa teteyotl, mohueyili hasta mochijqui se hueyi tepetl huan quitemiti nochi tlaltepactli.

Nopa achtohui tlanahuatlistli: Babilonia

³⁶“Hujca ya nopa eliyaya motemic. Huan ama nimitzpohuilis tlachque quij- tosnequi. ³⁷Ta titotlanahuatijca, tiitztoc nopa tlanahuatijquetl tlen más hueyi que nochi tlanahuatiani. Toteco Dios tlen itz- toc elhuicac mitzmacatoc ni tlanahuatlist- tli huan miyac chicahualistli. Yajaya qui- chijtoc para nochi tlacame ma mitztlepa- nitaca huan mitzmacatoc nochi mohueyi- tilis. ³⁸Yajaya mitzcahuilijtoc xiquinna- huati tlaltini campa hueli campa itztoque tlacame, tlapiyalime huan totome. Yajaya tlen quitlalijtoc momaco nochi para xi- quinnahuati. Nopa teteyotl itzonteco mitzixnextía ta, totlanahuatijca. Ta tinopa tzontecomitl tlen oro.

Nopa ompa tlanahuatlistli:

Media huan Persia

³⁹“Huan teipa quema tlamis titlana- huatis, pehuas seyoc tlanahuatlistli tlen quiixnextía iyolixco tlen plata nopa tete- yotl, pero nopa tlanahuatlistli ax quipiyas chicahualistli queja ta tijpiya.

Nopa expa tlanahuatlistli: Grecia

“Quema tlamis nopa ompa tlanahuati- listli, pehuas seyoc tlanahuatlistli tlen quiixnextía nopa bronce tlen tiquitac ipan

ijti nopa teteyotl. Nopa tlanahuatijquetl nojquiya quipiyas tlanahuatili ipan nochi tlaltepactli.

Nopa najpa tlanahuatlistli: Roma

⁴⁰“Pero teipa pehuas nopa najpa hueyi tlanahuatlistli tlen quiixnextía nopa hi- erro ipan ne teteyotl. Ni tlanahuatlistli quipiyas miyac fuerza. San queja hierro hueli tlaxolehua, ni tlanahuatijquetl qui- tlamiltis huan quixolehuas nochi sequinoc tlanahuatlistli huan quintlanis nochi tla- tini. ⁴¹Nojquiya tiquitac iicxihua huan ixocpilhua canactzi eliyaya hierro huan canactzi eliyaya soquitl icsitoc. Nopa tla- nahuatlistli tlen quiixnextía nopa hierro huan soquitl elis se tlanahuatlistli tlen te- ipa motlajcoitas. Elis tetic huan quipiyas chicahualistli pampa tiquitac canactzi hi- erro, pero nojquiya tiquitac maneltic ica soquitl. ⁴²Huan pampa tiquitac ixocpil- hua canactzi hierro huan canactzi san so- quitl icsitoc, quijtosnequi para canactzi quipiyas chicahualistli, pero nojquiya ca- nactzi axtle. Nimantzi moxolehuas queja tlapani se soqui chachapali. ⁴³Huan tlen tlacananaj ipan nopa najpa tlanahuatlistli quinequise quinsejcotilise inintlacajhua para itztoque san se. Pero queja hierro ax hueli momanelos ica soquitl, ax huelis quinsejcotilise.

**Nopa tlamiya tlanahuatlistli:
nopa tlanahuatlistli tlen elhuicac**

(Mt. 3:2)

⁴⁴“Huan ipan nopa tonali quema tlanahuatijtose nopa tlanahuatiani tlen quin- nextía ixocpilhua nopa teteyotl, Toteco Dios tlen itztoque elhuicac quiquetzas se tlanahuatlistli campa itlacajhua tlen axaca huelis quisemanas, niyon ax quicahuas nopa itlanahuatilis ica seyoc. Huan ax aqui huelis quitlanis nopa tlanahuatij- quetl tlen Toteco Dios quitlalis para no- chipa. Itlanahuatijcayo quintlamiltis no- chi sequinoc tlanahuatiani huan inintlana- huatijcayo, huan ayoc tleno mocahuas tlen ne sequinoc. Nopa tlanahuatlistli huan nopa tlanahuatijquetl tlen Toteco quitlalijtos huejcahuas para nochipa.

45 Tiquitac nopa tetl tlen quisqui ica iselti huan momajcajqui tlen nopa tepetl. Huan quixacualo huan quichijqui queja tlaltej-poctli nopa hierro, bronce huan soquitl. Ya ni quiixnextía itlanahuatilis Toteco Dios. Huajca totlanahuatijca, ipan motemic Toteco Dios tlen más hueyi mitznex-tlijtoc tlen panos teipa ipan ni tlaltepactli. Huan ni temictli tlen Toteco mitzmacatoc nelía melahuac. Huan nojquiya senquistoc temachtli tlen nimitzpohuilijtoc tlen quij-tosnequi.”

Nabucodonosor quihueyitlali Daniel

46 Huajca Tlanahuatijquetl Nabucodonosor motlancuaquetzqui iixpa Daniel huan mohuijtzonqui tlalchi para quihueyichihuas Daniel. Huan nojquiya quinnahuati itlacajhua ma quimacaca se tlacajcahualistli huan ma quipopochhuica ica copali tlen ajhuiyac. 47 Huan Nabucodonosor quihueyitlali Daniel:

—Nelía melahuac moDios itzotc tlen más hueyi que nochi sequinoc dioses. Yajaya ininTeco nochi tlanahuatiani. Yajaya hueli tenextilía tlamantli tlen axaca quimati pampa niquita para melahuac mitznex-tlijtoc ni tlamantli tlen nijtemijqui.

48 Huan teipa nopa tlanahuatijquetl quihueyitlali Daniel huan quitequimacac para ma quihuica más tequihuejcayotl huan quimacac miyac tlamantli tlen paj-patiyo. Nojquiya quitlali ma eli gobernador ipan nopa estado campa mocajqui altepetl Babilonia. Huan quitlali ma eli nopa tlayacanquetl tlen más hueyi que nochi tlanamijca tlacame ipan tlatl Babilonia. 49 Nojquiya Daniel quitlajtiani nopa tlanahuatijquetl para ma quitequimaca ihuampoyohua, Sadrac, Mesac huan Abed Nego. Huan quinmacac tequihuejcayotl ipan tequicali ipan nopa estado campa mocajqui altepetl Babilonia, pero Daniel mocajqui ichaj nopa tlanahuatijquetl ica se tequihuejcayotl tlen más hueyi.

Nabucodonosor quichijqui se teteyotl tlen oro

3 Huan teipa nopa Tlanahuatijquetl Nabucodonosor tlanahuati ma quichij-

chihuaca se teteyotl tlen oro tlen quipixqui 26 metros ihuejcapanca huan nechca eyi metros itomajca. Huan tlanahuati ma quitlalica ipan ne tlamayamitl tlen itoca Dura nechca altepetl Babilonia. 2 Teipa tlanahuati ma mosentilica nochi tlen quihuicayayaj tequihuejcayotl ipan nochi tlatlani ipan itlanahuatilis. Quinntozqui itlapalehuicahua, itlaconsejomacahua, ipresidentes, igobernadores, ijueces huan itlayacanca soldados huan tlen quimocuitlahuijque itomi. Tlanahuatijquetl Nabucodonosor quinilhui ma hualaca huan quihueyitlali Daniel se teteyotl tlen quiquetztoya. 3 Huajca ajsicoj nochi hueyhueyi tlacame huan mosentilijque iixpa nopa teteyotl para quihueyitlali Daniel. 4 Huan se tlanojnotzquetl chicahuac camatqui huan quinilhui nopa tlacame: “Xijtlacaquilica, nochi intlacame tlen inhualajtoque campa hueli tlatlani huan tlen incamatij tlen hueli tlajtoli tlen onca. 5 Que ma iniquicaquise tlapitzaj nopa tlatzotzonani ica nochi inintlapitzalhua, nimechnahuatía ximotlancuaquetzaca huan xijhueyichihuaca nopa teteyotl tlen oro tlen Tlanahuatijquetl Nabucodonosor tlanahuati ma quisencahuaca. 6 Huan intla



Nabucodonosor quichijqui se teteyotl tlen oro.

acajya ax motlancuaquetzas huan ax quihueyichihuas nopa teteyotl, nimantzi quimajcahuase ipan se hueyi tlilelemectli.”

⁷Huajca quema quicajque tlapitzaj nopa miyac tlapitzani, nochi nopa miyac tlacame tlen campa hueli hualajtoyaj huan tlen camatiyayaj tlen hueli tlajtoli, nochi motlancuaquetzque huan quihueyichijque nopa teteyotl tlen oro tlen Nabucodonosor quichijchijtoya.

**Eyi israelita telpocame
ax quihueyichijque nopa teteyotl**

⁸Huan ipan nopa tlalochtli sequin tlanamijca tlacame hualajque huan quinteihuicoj nopa israelita telpocame iixpa Tlanahuatijquetl Nabucodonosor. ⁹Quilhuijque:

—Totlanahuatijca, ¹⁰ta titlanahuati para nochi tlacame ma motlancuaquetzaca iixpa ne teteyotl tlen oro huan nimantzi ma quihueyichihuaca quema quicaquisquíaj tlapitzaj nopa tlatzotzonani. ¹¹Huan tiqijto intla acajya ax quichihuas, quimajcahuase iijtic nopa horno tlen xahuantoc. ¹²Pero itztoque sequin israelitame tlen tiqintlalijtoc para quipiyase hueyi tequihueycayotl ipan ni altepetl Babilonia, huan yajuanti ax mitztlepanitaj. Ax quihueyichihuaj todioses, niyon nopa tlaixcopincayotl tlen oro tlen tijchijtoc. Inintoca Sadrac, Mesac huan Abed Negro.

¹³Huajca nelía cualanqui Nabucodonosor huan tlanahuati ma quihuiquilica iixpa Sadrac, Mesac huan Abed Negro. Huan quinhualicaque. ¹⁴Huan Nabucodonosor quintlatzintoquili:

—¿Nelía ax inquihueyichihuaj nodioses, niyon nopa tlaixcopincayotl tlen oro tlen nijchijchijtoc? ¹⁵Monequi ximocualtlalica para xijhueyichihuase. Huajca amantzi quema tlatzotzonase, monequi ximotlancuaquetzaca iixpa nopa teteyotl tlen nijchijchijtoc huan xijhueyichihuaca. Huan intla inquichihuase, cualtitoc. Pero intla ax inquihueyichihuase, nimantzi inmechmajcahuase iijtic nopa tlilelemectli tlen xahuantoc. Huan ax aqú se totioti tlen huelis inmechmanahuis nopano.

¹⁶Huajca Sadrac, Mesac huan Abed Negro quinancuilijque nopa tlanahuatijquetl huan quilhuijque:

—Timitzcamahuase xitlahuac. Ax timocuesohuaj ica tlen topantis. ¹⁷Toteco Dios tlen tijhueyichihuaj quipiya chichahualistli para techmanahuis tlen nopa tlilelemectli huan huelis quichihuas. ¹⁸Pero cuali xijmati ya ni, totlanahuatijca, yonque ax techmanahuisquía, ax tijhueyichihuase nopa tlaixcopincayotl, niyon ax timotlancuaquetzase iixpa nopa teteyotl tlen oro tlen tijchijchijtoc.

**Toteco quinmanahui nopa telpocame
ipan tlitl**

¹⁹Huan quema Nabucodonosor quicajqui ni tlajtoli, nelía cualanqui hasta moixchichilo ica nopa eyi telpocame. Huan tlanahuati ma quitemilica chicome hueltas más cuahuitl nopa horno para tlahuel más quixahuanaltise huan ax queja achtohui. ²⁰Teipa quintitlanqui sequin soldados tlen más quipixque fuerza para ma quintatatzoca Sadrac, Mesac huan Abed Negro, huan ma quinmajcahuaca ipan nopa tlilelemectli iijtic nopa horno. ²¹Niyon ax quinquixtilijque ininyoyo, inintzontzajca huan inintlaque tlen moquentijtoyaj. San quintatatzozque huan quinmajcajque iijtic tlilelemectli pampa nopa tlanahuatijquetl quinequiyaya quinmictis nimantzi. ²²Huan pampa ne tlanahuatijquetl tlanahuatijtoya para ma quixahuanaltica tlahuel nopa horno, nopa tlilelemectli quinpipitzo huan quinmicti nopa soldados tlen quinmajcajque Sadrac, Mesac huan Abed Negro. ²³Huan Sadrac, Mesac huan Abed Negro huetzitoj horno ijtíc ilpitoque.

²⁴Huan nimantzi Nabucodonosor momajmati huan moquetztiquisqui campa mosehujtoya. Huan quintlajtlani itlapalehujcahua tlen más huejhueyi:

—¿Ax tiquinmajcajque eyi telpocame ilpitoque ipan tlitl?

Huan tlanancuilijque:

—Quena, totlanahuatijca.

²⁵Huan ne tlanahuatijquetl quijto:

—Xiquitaca, niqunita nahui tlacame malacantoque huan nemij ipan tlatlajco

tlitl huan ax tleno ininpanti. Huan ne naj-pa tlatcatl nesi queja se dios.



Nopa tlanahuatijquetl quinitac nahui tlacame ijitic tilelemectli.

26 Huajca Nabucodonosor monechcahui iteno nopa tlelemectli huan tlahuejchijqui huan quijito:

—¡Sadrac, Mesac huan Abed Nego, imojuanti tlen inquitequipanohuaj nopa Dios Tlen Más Hueyi, xiquisaca huan xihualaca nica!

Huan nopa eyi quisque tlen nopa tlelemectli, 27 huan nochi nopa tlacame tlen nopano itztoyaj huan quihuicayayaj tequihuejcaoytl ipan nopa tlali, quinnehcahuique ni eyi telpocame. Huan quintlachilijque huan momacaque cuenta para ax quintlatijtoya tlitl ipan inintlacayo, niyon ax tleno quichihuiliytoya ipan inintzoncal, niyon ininyoyo. Niyon ax mijmiyotiyayaj intla monechcahuiytoyaj campa poctli.

Nopa tlanahuatili tlen Nabucodonosor quichijqui

28 Huajca Nabucodonosor quijito: “¡Ma tijhueyichihuaca Dios, yajaya tlen ininTeco Sadrac, Mesac huan Abed Nego! Yajaya quititlanqui ielhuicac eja para ma quinmanahui itlatequipanojcahua pampa motemachijque ipan ya. Yajuanti ax nechihuiliijque cuenta na, nitlanahuatijquetl, huan tlen niquinnahuati. Hasta motemacaque para miquise para ax motlancuaquetzase para quihueyichihuase seyoc

tlen ax ininTeco Dios. 29 Huajca ama, na nitlanahuatía para nochi tlacame ipan nochi taltini huan tlen camatij nochi tlamantli tlajtoli ma quimatica para ax aqui hueli quimahuispolos ininTeco ni telpocame. Huan intla acajya quichihuas, nitlanahuatis ma quinhuejhueloca huan ma quinoxolehuaca ininchajchaj huan san mochi huas queja campa quimontonohuaj tlasoli. Pampa ax aqui seyoc totiotzi ipan ni tlattepectli tlen hueli temaquixtía quejni.”

30 Huan teipa ne tlanahuatijquetl quin-tequimacac Sadrac, Mesac huan Abed Nego ma quiyipaca noja más tequihuejcaoytl ipan nopa altepetl Babilonia.

Tlanahuatijquetl Nabucodonosor quixpaxqui seyoc temictli

4 Teipa Tlanahuatijquetl Nabucodonosor quintlajcuilhui nochi tlacame ipan itlanahuatilis ica ni tlajtoli:

“Na, niTlanahuatijquetl Nabucodonosor, nimechtlajpalohua nochi intlacame ipan nochi taltini ipan ni tlattepectli tlen incamatij nochi tlamantli tlajtoli tlen onca. 2 Nijnequi xijmatica imojuanti nopa tlamantli tlen nelyeyectziti tlen Dios Tlen Más Hueyi quichijtoc nica noixtla. 3 ¡Nelia huejhueyi nopa tlamantli tlen quichijqui huan san tijsentlachilijtoque! Yajaya itlanahuatilis huejcahuas para nochipa. Tlanahuatis huan quiipayas ihueyi chicahualis para nochipa quema noja tlacajtiyase iniixhuihua tlacame.

4 “Na, niNabucodonosor, niiztoya ica paquilistli ipan nochaj tlen hueyi huan nochi tlen yejectzi nijpiyayaya. 5 Pero se tlayohua quema nimotectoya, nijtemijqui miyac tlamantli tlen nelía nechmajmati. 6 Huajca nitlanahuati ma hualaca nechitaquij nochi tlanamijca tlacame ipan tlali Babilonia huan ma nechixtomilica tlachque quijtosnequi notemic. 7 Huan hualajque nochi tlen tetlajchihuía, huan tlen quincama-huaj ajacame, huan tlen momachtíaj sitlalime huan tlen tetonalitaj, huan ni-quinpohuili notemic, pero ax huelque

nechilhuijque tlachque quinequiyaya quijitos. ⁸ Pero teipa monechcahui Daniel tlen nojquiya itoca Beltsasar queja itoca nototitzi. Ipan iyolis Daniel qui-piya ichicahualis itonal nopa Dios tlen tlatzejtzeltic. ⁹ Huan nijpohuili notemic huan niquilhui: ‘Beltsasar, ta tlen más titlalnamiqui que nochi tlalnamijca tlacame, na nijmati Itonal Dios itztoc ipan ta. Huan nijmati ta tijmachilia nochi tlamantli tlen axaca hueli quimachilia. Huajca xijtlaquili nochi tlen niqitac ipan notemic, huan xinechilhui tlachque quijitosnequi. ¹⁰ Ya ni notemic tlen niqitac quema nicochtaya. Tlatlajco ipan se tlamayamitl niqitac se cuahuil nelhuejcapantic. ¹¹ Nopa cuahuil moscaltijiyajqui huan mochijqui neltomahuac huan huejcapantic hasta conajsiyaya elhuicactli. Nochi tlacame hueliyayaj quuitase nopa cuahuil tlen campa hueli itztoyaj ipan tlattepectli yonque nelhuejca. ¹² Nelía eliyaya yejectzi ixihuiyo huan temacayaya miyac itlajca, hasta quiaxiliyaya para quintlamacase nochi tlacame campa hueli. Nochi tlapiyalime tlen cuatitla moecahuiliyayaj itzintla huan ipan imacuayo motepasoltyayaj totome. Huan nochi tlapiyalime huan totome ipan tlattepectli quicuayayaj itlajca nopa cuahuil.

¹³ “Teipa ica se tlochtli niqitac se tlayolmelajquetl tlen tlamocuitlahuía, se tlatzejtzeltic elhuicac ejquetl tlen temoyaya tlen elhuicac. ¹⁴ Huan chicahuac nopa elhuicac ejquetl quijito: Xijzontequica nopa cuahuil huan xijmacuayotzontequica. Xijquixtilica ixihuiyo huan xijsemanaca itlajca. Ma choloca nochi tlapiyalime tlen moecahuiliyayaj itzintla huan nochi totome tlen itztoque ipan imacuayo. ¹⁵ Pero xijcahuaca icuatsonyo huan inelhuayo. Huan xijtatacatzoca icuatsonyo ica cadenas tlen hierro huan bronce. Huan xijcahuaca campa eltoc ica yancuic sacapetlatl yahualtic. Ma huetzi ajhuechtlí ipan nopa tlatcatl tlen ni cuahuil quiixnextía. Huan nopa tlatcatl ma qui-

piya iyolis queja nopa tlapiyalime tlen quicuajtinemij sacatl.

¹⁶ “Huan xijcahuili para itlalnamiquilis ayoc elis queja itlalnamiquilis se tlatcatl, pero ma huihuities huan ma mocuepa queja itlalnamiquilis se tlapiyali. Huan para chicome xihuilit queja nopa ma eli.

¹⁷ “Ya ni nopa tlatzacuultistli tlen tlanahuatijtoque tlatzejtzeltijca elhuicac ehuaní para yajaya ma quiseli. Tlayolmelajtoque para queja nopa ma ipantis ni tlatcatl. Quej ni nochi tlacame quimatise para Dios Tlen Más Hueyi qui-piya tequihuejcaoytl ica nochi tlanahuatiani ipan tlattepectli huan ica nochi inintlanahuatijcayo. Huan Dios quimaca tequihuejcaoytl huan se tlanahuatistli tlen yajaya quinequi. Yajaya hueli quichihua tlanahuatijquetl tlen hueli tlatcatl, yonque se tlen más moicnonequi.”

¹⁸ Huan niquilhui Beltsasar: “Huajca ya ni nopa temictli tlen na, niTlanahuatijquetl Nabucodonosor, nijpixqui. Huajca ama xinechilhui tlachque quinequi quijitos pampa niyon se tlanamijca tlatcatl ipan notlanahuatijcayo ax hueli nechilhuis. Pero ta, quena, tihueli pampa Itonal nopa Dios tlen tlatzejtzeltic itztoc ipan ta.”

Daniel quiilhui Nabucodonosor tlachque quijitosnequi itemic

¹⁹ Huajca Daniel, tlen nojquiya quitocaxtíaj Beltsasar, huejcaqui san tlachixtoc pampa quimajmatiyaya tlen moilhuiyaya. Pero nopa tlanahuatijquetl quiilhui:

—Beltsasar, amo ximocueso ica nopa temictli tlen nijpixqui, niyon ica tlen quinequi quijitos.

Huajca Beltsasar quinanquili:

—Notlanahuatijca, nipaquisquía intla motemic eltosquía para mocualancaitacahua ica nochi tlen quijitosnequi, pero ax queja nopa eltoc. ²⁰ Tiquitac se hueyi cuahuil tlen moscaltí tomahuac huan ajsiyaya hasta elhuicactli huan nochi tlacame campa hueli ipan tlattepectli huelque quilitaj. ²¹ Quipixqui ixihuiyo tlen yejectzi

huan quipixqui miyac itlajca hasta quiaxiliyaya para quintlamacas nochi tlacame. Huan itzintla nopa cuahuatl moecahuiliyayaj tlapiyalime, huan motepasoltiyayaj to-tome. ²²Nopa cuahuatl quixnextía ta, to-tlanahuatijca. Ta tinopa cuahuatl. Ta timoscaltijtoc hasta nelía tihueyi huan miyac chicahualistli tijiya. Mohueyitilis mohueyichijtoc hasta onajsi nechca elhuicac huan motlanahuatijcayo momoyajtoc ipan nochi tlaltepactli.

²³“Nojquiya tiqitac para se elhuicac ejquetl tlen tlamocuitlahuía temoc tlen elhuicac huan quijto: Xijzontequica nopa cuahuatl huan xijcocotzaca, pero xijcahuaca nopa cuatzomitl ica inelhuayo. Huan xijtatacatzoca nopa cuatzomitl ica cadenas tlen hierro huan bronce, huan xijcahuaca ma elto nopano campa nopa yancuic sacapetlatl. Ma huetzi ajhuechtli ipan nopa tlatcatl tlen nopa cuahuatl quixnextía. Yajaya ma eli queja se tlapiyali tlen itztoc ipan cuatitlamitl para chicome xihuitl.

²⁴“Huan ama, Totlanahuajtica, nimitzilhuis tlen quijtosnequi. Ya ni tlen Dios Tlen Más Hueyi tlanahuatijtoc para mopantis ta. ²⁵Mitzquixtise para ayoc tiitztos campa tlacame. Tiitztos ininhuaya tlapiyalime tlen cuatitlamitl. Tijcuas sacatl queja huacaxme, huan nopa ajhuechtli tlen huetzis tlen elhuicac quixolonis mocuitlapa. Queja nopa tiitztos para chicome xihuitl hasta timomacas cuenta para Dios Tlen Más Hueyi itztoc tlen quiyiya tequihuejcaoytl ica nochi tlanahuatistli tlen tlacame quiyijaj ipan ni tlaltepactli. Huan yajaya tlen quitlalfía ma tlanahuati nopa tlatcatl tlen ya quinequi ipan sesen tlanahuatistli. ²⁶Pero nopa tlanahuatili para ma quicahuaca nopa cuatzomitl ica nochi inelhuayo, quinequi quijtos para sampa titlanahuatis huan sampa tijiayas motlanahuatijcayo, pero hasta quema timomacas cuenta para nopa Dios tlen itztoc ipan elhuicac quiyiya nochi tequihuejcaoytl. ²⁷Huajca notlanahuatijca, xijtlacaquili tlen nimitzilhuía. Ximoyolcuepa huan xijcahua motlajtlacolhua. Ximoiyocacahua ica tlen ax cuali tijchihuayaya. Huan xij-

chihua tlen xitlahuac huan xiquinpalehui tlen teicneltzitz. Nohueli queja nopa tiitztos ica cuali ica nochi tlen tijiya.”

Ilocojo Tlanahuatijquetl Nabucodonosor

²⁸Huan nochi ni tlamantli tlen quitemijqui Tlanahuatijquetl Nabucodonosor, quipanoc. ²⁹Quema panotoya se xihuitl para quipixqui ni temictli, nopa tlanahuatijquetl nejnemiyaya icalpani ipan altepetl Babilonia campa momatqui mosiyajcahua, ³⁰huan quijto: “¡Xiquitaca! Na ica nohueyi chicahualis, nijchijtoc ni hueyi altepetl campa nimosehuía para nitlanahuatis ipan ni nohaj tlen yejyectzi. Ihuex-tilis ni altepetl quixnextía noricojo huan para nelía hueyi notequihuejcaoy.”

³¹Pero quema noja camatiyaya nopa tlanahuatijquetl, quicajqui se tlen camati tlen elhuicac huan quijto:

“Xijcaqui ya ni, Tlanahuatijquetl Nabucodonosor. Toteco Dios ya mitzquixtilijtoc motlanahuatijcayo. ³²Huan motlacajhua mitzquixtise para ayoc tiitztos campa tlacame. Tiitztos ininhuaya nopa tlapiyalime campa cuatitlamitl huan tijcuajtinemis sacatl para chicome xihuitl queja quicauj huacaxme. Queja nopa tielis hasta timomacas cuenta para Toteco Dios Tlen Más Hueyi tlanahuatía ipan nochi tlaltepactli huan yajaya tlen quintlalía tlanahuatiani tlen yajaya quinequi.”

³³Huan nimantzi pejqui pano nochi nopa tlamantli tlen quitemijqui. Quiquix-tijque para ayoc ma itztos campa tlacame. Huan pejqui quicua sacatl queja huacaxme huan nopa ajhuechtli tlen huetziyaya quixoloniyaya icuitlapa. Itzoncal moscalti huan mochijqui queja iijhuiyo nopa hueyi cuajtli. Huan iisti moscalti queja iniisti to-tome.

Nabucodonosor mochicajqui

³⁴Huajca Nabucodonosor quijto:

“Huan quema tlanqui nopa chicome xihuitl, na niNabucodonosor, nitlachixqui elhuicac huan notlanamiquilis mocuepqui queja achtohui eliyaya. Huan nijtlascamatqui Toteco Dios Tlen

Más Hueyi huan nijhueyichijqui huan nijhueyitlepanitac yajaya tlen itztoc para nochipa.

Yajaya tlanahuatis para nochipa, huan itlanahuatilis ax quema tlamis.

³⁵ Iixpa ya ax tleno topati tojuanti tlen tiitztoque ipan tlaltepactli. Quichihua tlen yajaya ipaquilis nepa elhuicac, huan nojquiya nica ipan ni tlaltepactli.

Axaca tlen huelis quitzacuilis tlen ya quinequi quichihuas.

Niyon ax aqi huelis quitlatzintoquilis, para tlen quichijqui tlen ya quichijtoc.


³⁶ “Huan ipan nopa tlalochtli quema mocuepqui notlalnamiquilis, nojquiya mocuepqui notlanahuatijcayo huan nohueyi chicahualis. Huan nopa tlacame tlen nechpalehuiyayaj para nitlanahuatis huan tlen nechconsejomacayayaj pejque nechtemohuaj. Huan nechtequiltlalijque sampa ipan notlanahuatijcayo huan nijpixqui más tlatlepanitacayotl que achtohuiya. ³⁷ Huajca ama na, niNabucodonosor, nijtlepanita, huan nijhueyichihua, huan nijhueyitlalia nopa Tlanahuatijquetl Tlen Elhuicac pampa nochi tlen yajaya quiijtohua melahuac huan nochi tlen quichihua xitlahuac. Huan yajaya quimati quejatz quinpinahualtis tlacame tlen mohueyimajtinemij.”

Nopa tlajcuiloli ipan tlapepecholi

5 Huan miyac xihuítl teipa quema tlantoya itlanahuatilis Nabucodonosor, pejqui quihuica tequihuejcyotl iixhui tlen itoca eliyaya Belsasar. Huan Belsasar quichijqui se hueyi tlacualistli huan quinnotzqui ma hualaca se mil tlacame tlen huejhueyi tlen nojquiya quipixque tequihuejcyotl ipan itlanahuatilis. Huan ipan nopa tlacualistli Belsasar quiiyaya miyac xocomeca atl tlen ya xocoxtoya ininhuaya itlanotzalhua. ²Huan quema tlaiyayaj, Belsasar tlanahuati ma quicuitij nopa tazas tlen oro huan tlen

plata tlen ihueyi tata, Nabucodonosor, quihualicatoya tlen nopa tiopamítl tlatzejtzeltic tlen elqui ichaj Toteco Dios ipan altepetl Jerusalén. ³Huan nopa tazas quihualicacque huan ipan tlaique Belsasar, itlanotzalhua, isihuajhua huan nopa sihuame tlen Belsasar quinaxcatijtoya. ⁴Huan quema tlaiyayaj ipan nopa tazas tlatzejtzeltique, quinhueyichihuayayaj inintotiotzitzitzi tlen quinchijtoyaj ica oro, plata, bronce, hierro, cuahuítl huan tetl.

⁵Huan nimantzi ipan nopa tlalochtli nesqui se majtli huan pejqui tlajcuilohua ipan nopa chipahuac tlapepecholi ipan ichaj nopa tlanahuatijquetl iixmelac nopa tlahuítl quetzali. Huan nopa tlanahuatijquetl quiiac nopa majtli tlen tlajcuilohuayaya, ⁶huan ixayac chipahuixqui huan tlahuel pejqui majmahui. Pejqui motlanacuatejtetzona, huan yamanixqui imetzo-



Se majtli pejqui tlajcuilohua ipan nopa chipahuac tlapepecholi.

miyo huan yajaya huetzqui. ⁷Huan Belsasar pejqui tlahuelchihua chicahuac huan quinilhui ma quinnotza nopa tlacame tlen quincamahuíaj ajacame, huan tlen momachtíaj sitlalime huan tlen tetonalitaj. Huan quema ajsico, nopa tlanahuatijquetl quinilhui nopa tlanamijca tlacame:

—Intla se tlen imojuanti huelis quipohuas ni tlajcuiloli huan nechixtomilis tlachque quijtosnequi, nitlanahuatis ma quiyoyontica ica yoyomtl ten moradojtíc para tlanahuatis. Huan quiccuapilhuilise se cade-na tlen oro ipan iquechtla huan quipiyas nopa expa tequihuejçayotl ipan nochi totlal.

⁸Huan quema ajsitoyaj nochi nopa tlanamijca tlacame tlen quitequipanohuaya-yaj nopa tlanahuatijquetl, axaca huelqui quipohuas tlen ijcuilijtoc, niyon axaca hueliyaya quixtomilis tlachque quijtosnequi. ⁹Huajca nelía majmajqui Tlanahuatijquetl Belsasar, huan achi más chipahuixqui ixayac. Huan nochi nopa huejhueyi tlacame tlen nopano itztoyaj mocuesohuayayaj pampa ax quimatiyayaj tlachque moilhuisse. ¹⁰Pero nopa hueyi sihua tlanahuatijquetl tlen eliyaya inana quicajqui quema tlhuelchihuayaya icone ininhua-ya nopa huejhueyi tlacame tlen quinnotztoya. Huajca inana calajqui campa tlacua-yayaj huan quiihlui:

—¡Totlanahuatijca, xiitzto miyac tonali! Amo ximocueso, niyon amo ximoixchihua. ¹¹Ipan motlanahuatijçayo itzto se tlatcatl tlen quipiya Itonal nopa Dios tlen tlatzejtzeloctic. Huan quema mohueyi tata eliyaya tlanahuatijquetl, ne tlatcatl tenextili para nochi quimatiyaya huan para yajaya tlanamiqui queja se totiotzi. Yeca mohueyi tata Tlanahuatijquetl Nabucodonosor quitlali Daniel ma eli tlayacanquetl tlen más hueyi que nochi tlanamiquini huan nochi tlen tetonalitaj huan tlen momachtíaj sitlalime huan tlen tetlajchihúaj. ¹²Quichijqui ya ni pampa ni tlatcatl, Daniel, tlen nopa tlanahuatijquetl quito-caxti Beltsasar, quipanti neltlanamiqui. Nochi quimati huan nochi quimachilía. Nojquiya hueli teyolmelahuas tlen quinequi quijtos nochi temictli huan nochi tlajtoli tlen ohui tlen tlacame moilhuijtoque. Tlen axaca más hueli quimachilía, yajaya hueli. Huajca xijnotza Daniel, huan yajaya mitzilhuis tlachque quijtosnequi tlen ijcuilijtoc ipan tlapepecholi.

¹³Huajca quihuicaque Daniel iixpa huan nopa tlanahuatijquetl quitlatzintotl:

—¿Ta tiDaniel, se tlen nopa israelitame tlen nohueyi tata, Nabucodonosor, quinhuacac tlen tlali Judá?

Huan Daniel quinanquili:

—Quena, naja.

¹⁴Huan quiihlui:

—Nechilhuijtoque para tijpiya Itonal Dios huan tijpiya se cuali tlanamiquilistli huan nochi tijmachilía. ¹⁵Ya nechhuilijque nopa tlacame tlen más tlanamiquij huan yajuanti tlen quincamahuáj ajacame para ma quipohuaca ni tlajtoli huan nechilhuisquáj tlachque quijtosnequi. Pero niyon se ax huelque. ¹⁶Pero nijcactoc para ta tihueli tiquixtoma tlamantli huan tijmachilía nochi tlen ohui. Huajca intla huelis tijpohuas ni tlajtoli huan tnechilhuis tlachque quijtosnequi, nitlanahuatis ma mitzyoyontica ica yoyomtl moradojtíc para titlanahuatis, huan mitzcuapilhuilise se costli tlen oro ipan moquechtla. Huan tijpiyas nopa expa tequihuejçayotl ipan notlanahuatijçayo.

Tlen quijtosnequi tlajcuiloli ipan tlapepecholi

¹⁷Huajca Daniel quiihlui nopa tlanahuatijquetl:

—Ax tleno nijnequi nijselis. Huelis tijmacas seyoc nopa tlamantli. Pero quena, nimitzpohuilis nopa tlajtoli tlen ijcuilijtoc ipan tlapepecholi huan nimitzilhuis tlen quijtosnequi. ¹⁸Nopa Dios Tlen Más Hueyi quimacac mohueyi tata Nabucodonosor itlanahuatilis tlen tlhuel hueyi. Axaca itztoya más hueyi que ya. Toteco quichijqui rico hasta quinonpanoyaya nochi sequinoc huan quichijqui para nochi tlacame ma quitlapanitaca. ¹⁹Huan pampa Toteco quichijtoya ma eli hueyi, nochi tlacame ipan nochi taltini huan tlen hueliyaya camatij nochi tlajtoli quiimacasiyayaj hasta huihuipicayayaj iixpa. Yajaya quipixqui chichualistli para quinmictis tlen quinequiyaya huan quinchahuiliyaya ma yolica tlen ya quinequiyaya. Tlen quinequiyaya quinmacac se hueyi tequitl, quinmacac huan nojquiya quinpinahuati tlen quinequi. ²⁰Pero quema pejqui mohueyimati huan moyoltetili iixpa Toteco Dios, To-

teco quiquixti tlen isiya yejectzi campa tlanahuatiyaya huan quiquixtili nochi tlen cuajcualtzi quiqipiyayaya. ²¹ Toteco quiquixti tlen campa tlacame huan quimacac itlanamiquilis se cuatitlan tlapiyalí huan yajqui huan itztoya ininhuaya cuatitlan tlapiyalime. Huajca mohueyi tata Nabucodonosor quicujqui sacatl queja huacaxme huan quicuitlapanaxoloni nopa ajhuechtli. Huan queja nopa mocajqui hasta quema momacac cuenta para Dios Tlen Más Hueyi quiptiya tlanahuatili ica nochi tlacame huan yajaya quitlalía tlen quinequi para tlanahuatis campa ya quinequi. ²² Pero ta, titotlanahuatijca Belsasar, yonque tiixhui huan tijmatiyaya tlachque ipantic, nojquiya ax timoechcapantlali. ²³ Pero noja más timohueyimajtoc iixpa Toteco Dios tlen itztoc ipan elhuicac. Pampa titlanahuati ma quitlalica ipan momeca nopa tazas tlen hualajqui tlen itiopa Toteco Dios. Huan ta ininhuaya motlanotzalhua, ica mosihuajhua huan nopa sihuame tlen tiquinaxcatijtoc intlaique ipan nopa tazas. Huan ica nopa tazas imomaco inqinhueyichijque imototiotzitzitzi tlen inqinhijchijtoque ica oro, plata, bronce, hierro, cuahuitl huan tetl. Huan imototiotzitzitzi ax tlachiyaj, ax tlacaquij, niyon ax tleno quimachilíaj. Huan Toteco Dios tlen mitzmaca yolistli mojmotla, huan tlen quiijtohua canque tiyas quema timiquis, ax tijtlepanitac niyon se huelta. ²⁴⁻²⁵ Huan yeca Dios quititlanqui nopa majtli tlen quiijcuilo nopa tlajtoli,

MENE, MENE, TEKEL, UPARSIN.

²⁶ “Huan ya ni tlen quiijtosnequi:

MENE: (Tlen quiijtohua ‘tlapohuali’.)

Quinequi quiijtos para Dios quipojtoc quesqui tonali huejcahuas motlanahuatijcayo huan mitzilhuía para nimantzi tlamis.

²⁷ TEKEL: (Tlen quiijtohua ‘tlajejyecoli’.)

Quinequi quiijtos Dios mitzzyejecojtoc, Tlanahuatijquetl Belsasar, queja se quiyejyecohua se tlamantli ipan balanza para quimatis intla quiaxilis tlen monequi o axtle. Huan yajaya quipantijtoc para ta mitzpolohua.

²⁸ UPARSIN: (Tlen quiijtohua ‘tlatlajcoitali’.) Quinequi quiijtos Toteco quitlajcoitztoc motlanahuatijcayo huan quinmacoc tlali Media huan Persia ehuaní.”

²⁹ Huajca nimantzi nopa Belsasar tlanahuati ma quiyoyontica Daniel ica yoyomitl tlen moradojtíc huan ma quitlalilica se cadena tlen oro ipan iquechtla. Huan quichijqui se tlanahuatili para ma quimatica nochi tlacame para ipan nopa tlalochtli Daniel pehuasquía quiipiyas tequihuej-cayotl huan para san yajaya, Tlanahuatijquetl Belsasar, huan itata quiqipiyase más tlanahuatili que Daniel ipan itlanahuatilis.

³⁰ Pero ipan nopa tlayohua hualajque tlacame tlen tlali Media huan quimictijque Belsasar tlen quinnahuatiyaya nopa caldeos. ³¹ Huan pejqui tlanahuatía Darío tlen hualayaya tlali Media. Huan Darío quiqipiyayaya 62 xihuitl quema pejqui itequi queja tlanahuatijquetl ipan nopa tlanahuatilitli.

Daniel ipan ostotl campa tecuanime

6 Huan Darío moilhui cuali para quitlajcoitas nopa tlaltini ipan itlanahuatilis ica 127 estados huan ipan sese estado quitlalis se gobernador para ma quiptiya tlanahuatili nopano. ² Huan nojquiya quintlalisquía eyi tlayacanani tlen quinahuatisquía nochi nopa 127 gobernadores ipan itlanahuatilis. Huan nopa gobernadores quipohuilisquía ni eyi tlayacanani tlen panoyaya ipan iniestado para quimocuitlahuise cuali. Quej ni nopa hueyi tlanahuatijquetl ax quipolosquía itomi. Huan Daniel eliyaya se tlen nopa eyi tlen quinnahuatiyaj gobernadores. ³ Huan nochi tlacame nimantzi quiixmatque para Daniel eliyaya más tlanamiqui que ne ome tlen quihuicayaj tequitl ihuaya. Huan nojquiya eliyaya más tlanamiqui que nochi nopa gobernadores pampa quipixqui se itonal tlen nelcuali. Huajca nopa tlanahuatijquetl moilhui para quitlalisquía Daniel para quinahuatisquía nochi tlaltini ipan itlanahuatilis. ⁴ Pero ne seyoc ome tlayacanani tlen gobernadores inin-

huaya nochi nopa gobernadores pejque quitemoláj quejatzá quiteilhuse Daniel para ax cuali quichihua itequi ipan nopa tlanahuatilstli. Pero Daniel eliyaya se cuali tlatcatl huan temachtli, huan niyon se tlamantli ax huelque quipantiláj tlen ica quiteilhuiscuáj. ⁵Huajca moilhuijque se ica seyoc: “Ax quema tijpantise se tlamantli ipan Daniel para ica tijteilhuse intla ax tiquijtose para ax cuali se tlamantli tlen quichihua pampa quineltoca itlanahuatil iDios.”

⁶Huajca nopa ome tlayacanani ininhua ya nopa gobernadores quisencajque tlen quichihuase huan yajque camatitoj ica Tlanahuatijquetl Darío, huan quihuijque:

—¡Totlanahuatijca, xiitzto miyac tonali! ⁷Nochi tojuanti titlayacanani huan ti-gobernadores, huan tlen tijhuicaj tequihuejcayotl moixpa ipan motlanahuatijcayo huan nochi totlapalehuijcahua san seico timoilhuijtoque tlen cuali tijchihuas. Timoilhuijá cuali tijchihuas se tlanahuatili o se acta para nochi san mitzhueyitlalise ta para se metztli. Huan intla se quihueyitlalis o quitlajtlanis tlapalehuili seyoc iDios o seyoc tlatcatl ipan ni metztli, monequi ma quimajcahuaca ipan nopa ostotl campa itztoque tecuanime. ⁸Huajca xijchihua nopa acta huan xijtlali mofirma huan mosello para mochihuas se tlanahuatili tlen axaca huelis quixolehuas queja eltoc nochi totlanahuatilhua tiMedia huan tiPersia ehuaní.

⁹Huajca nopa tlanahuatijquetl quijcuilo huan quitlali itoca ipan nopa acta tlen quipixqui nopa tlanahuatili.

Daniel momaijto queja nochipa quichijqui

¹⁰Huan quema Daniel quimatqui para nopa acta ya quichijtoya, yajqui ichaj ipan nopa cuarto huejcapa campa momatqui momaijtohua ica Toteco Dios. Huan quitlapo nopa ventanas para quitlachilis iixmelac campa ica huejca ipan seyoc tlali mocajqui altepetl Jerusalén. Huan nopano queja ipa quichihuayaya, motlancuaquetzqui iixpa Toteco Dios expa se tonal; huan momaijto huan quitlascamatqui.

¹¹Huan nopa tlacame mosentilijque huan yajque ichaj para quipijpiyatoj. Huan quipantijque Daniel momaijtohuayaya iixpa Toteco Dios huan quitlajtlaniyaya itlapalehuil. ¹²Teipa yajuanti yajque iixpa nopa



*Daniel momaijto ica Toteco Dios
queja nochipa quichihuayaya.*

tlanahuatijquetl huan quitlatzintoquilijque tlen nopa acta tlen quisencajtoya, quihuijque:

—Totlanahuatijca, ¿ax tijtlali motoca ipan se amatl tlen quijtohua ax aquí hueli momaijtos ica seyoc Dios, niyon quitlajtlanis itlapalehuil seyoc tlatcatl para se metztli? San nochi ma mitztemoca ta. Huan intla ax quitoquilía motlanahuatil se tlatcatl, quimajcahuase iijtic nopa ostotl campa itztoque nopa tecuanime. ¿Ax quej nopa quijtohua nopa acta?

Huan Tlanahuatijquetl Darío quijto:

—Quena, queja nopa eltoc huan nopa tlen ijcuilijtoc ax aquí huelis quipatlas pampa queja nopa quijtohua totlanahuatilhua tiMedia huan tiPersia ehuaní.

¹³Huajca nopa tlacame quijtojque:

—Daniel, se tlen nopa israelitame tlen quinhualicaque tlen tlali Judá, ax mitztlepanita, niyon ax quitlepanita nopa acta tlen tiquijcuilojtoc pampa tiquitztoque noja quitlajtlanía iDios expa se tonal.

¹⁴Huan quema nopa tlanahuatijquetl quicajqui ni tlamantli nelía mocueso. Huan pejqui quitemohua quejatzá quimanhuisquía Daniel. Huan quichijqui nochi tlen huelqui hasta quema tiotlaquixqui, pero ax tleno huelqui quichijqui. ¹⁵Huan nopa tlacame sampa monextijque iixpa nopa tlanahuatijquetl huan quihuijque:

—Totlanahuatijca, cuali tijmati para ti-Media huan tiPersia ehuaní tijpiyaj se tlanahuatili tlen quijtohua axaca hueli quixolehuas se acta tlen quijcuilojtoc se to-tlanahuatijca.

¹⁶Huajca nopa tlanahuatijquetl tlanahuati ma quinzotzati Daniel para quimajcahuase ipan ostotl campa tecuanime. Huan nopa tlanahuatijquetl quiilhui Daniel:

—Ma mitzmaquixti moDios tlen mojm-mostla tijtequipanohua.

¹⁷Huan quema quimajcajtoyaj Daniel ipan nopa ostotl, quihualicaque se hueyi tetl huan ica quicamatzajque cuali nopa ostotl. Huan campa ilpitoc nopa tetl, nopa tlanahuatijquetl quintlalili isello huan nojquiya quitlali isello itlapalehuicahua para ax aqui hueli quimanahuis. ¹⁸Teipa nopa tlanahuatijquetl yajqui ichaj huan ax tlacujqui, niyon ax cochqui, niyon ax aqui quicahuili ma quitlatzotzoniliqui queja momajtoya quichihua.

¹⁹Huan quema tlanesqui, mejqui huan nimantzi yajqui campa nopa ostotl ica tecuanime. ²⁰Huan quema monechcahuico nopa tlanahuatijquetl, quitzajtzi Daniel ica hueyi cuesoli huan quiilhui:

—Daniel, ta tiitlatequipanojca nopa Dios tlen itztoc. ¿MoDios tlen tijtequipanohua mojm-mostla mitzmaquixtijtoc tlen nopa tecuanime?

²¹Huan Daniel quinanquili:

—¡Totlanahuatijca, xiitzto miyac tonali! ²²Quena, noDios quititlanqui ielhuicac ejca huan quincamatzajqui ni tecuanime para ma ax nechcococa pampa quimati para ax nijpiya tlajtlacoli ica ya huan ax tleno ax cuali nijchijtoc ica ta.

²³Huajca nopa tlanahuatijquetl nelía pajqui huan tlanahuati ma quiquixtica Daniel. Huan quema quiquixtijque, ax cana quipantijque intla quicocojtoya pampa motemachi ipan iDios. ²⁴Huajca nopa tlanahuatijquetl tlanahuati ma quincuitij nopa tlacame tlen quiteilhuijtoyaj Daniel, ica ininsihuahua huan ininconeua, huan quinmajcaque osto ijtic campa itztoyaj nopa tecuanime. Huan aya onajsiyayaj hasta tlatzintla quema nopa leones huitonque inincuitlapa huan quincujque.

²⁵Huajca Tlanahuatijquetl Darío quintajcuilhui nochi tlacame ipan nochi taltitni tlen camatiyayaj nochi tlajtoli huan ipan nopa amatl quinilhui:

“¡Xiitzto ica cuali!

²⁶“Ama na nijchihua se yancuic tlanahuatili campa hueli ipan notlanahuatijcayo. Nochi tlacame ma quitlepantaca huan ma quihueyimatca Daniel iDios.

Pampa yajaya nopa Dios tlen yoltoc huan nochipa itztoc.

Huan itlanahuatilis ax aqui huélis quitlamiltis.

Yajaya tlanahuatis para nochipa.

²⁷Yajaya temaquixtía huan temocuitlahuía.

Quichihua huejhueyi tiochichahualnescayotl huan tlanextili tlen yejectzi ipan elhuicactli huan ipan tlattepacitli.

Yajaya tlen quimaquixtijtoc Daniel tlen nopa tecuanime.”

Queja nopa quijto nopa ley.

²⁸Huajca Daniel quisqui nelía cuali ipan nopa hueyi tequitl tlen quichihuaya ipan itlanahuatilis Darío, huan nojquiya teipa ipan itlanahuatilis nopa Tlanahuatijquetl Ciro ipan tlali Persia.

Nopa nahui tecuanime

tlen Daniel quintemijqui

7 Ipan nopa achtohui xihuitl para tlanahuatis Belsasar ipan tlali Babilonia, Daniel quipixqui se temictli huan ipan itemic quitaac miyac tlamantli tlen teipa panosquía. Huan quema isac, quijcuilo tlen quitaac para tepohuilis. ²Huan ya ni tlen Daniel quijcuilo:

“Tlayohua ipan notemic niquitac huallajqui tlen elhuicac miyac ajacatl tlen chichahuac tlaajacayaya tlen nahui lados huan tlahuel quitlanayayaj nopa hueyi atl. ³Huan teipa nahui huejhueyi tecuanime quisque ipan hueyi atl. Huan sese eliyaya sesen tlamantli.

Nopa achtohui tecuani

⁴“Nopa achtohui tecuani nesiyaya queja

se león, pero quipixtoya ieltlapalhua queja se hueyi cuajtli. Huan quema noja nijtlachiliyaya, quiquixtilijque ieltlapalhua para ax huelqui patlanis. Huan quitlalanque campa huilantoya tlalchi huan quichijque ma quitetonis imetz huan ma moquetza ica ome iicxihua queja se tlatcatl. Huan quichijque ma quiypiya iyolo queja se tlatcatl.

Nopa ompa tecuani

5“Huan nijtlachili nopa ompa tecuani huan nesiayaya queja se oso. Huan motlalanayaya ipan se ielchiqui más que ne seyoc, huan icamaco quipixtoya eyi elchiquihuitl tlen quitlanquechijtoc. Huan quiilhuijque: ‘Ximoquetza huan xijcua miyac nacatl.’

Nopa expa tecuani

6“Huan nijtlachili nopa expa tecuani huan nesiayaya queja se tecuani itoca leopardo, pero ipan icuitlapa quipixqui eyi ieltlapalhua queja se tototl. Huan nojquiya niqitac para quipiyayaya nahui itzontecohua huan quimacaque tlanahuatili para ma tlanahuatis.

Nopa najpa tecuani

7“Huan nopa najpa tecuani tlen niqitac temajmati huan eliyaya nelfiero, huan quipixqui miyac chicahualistli. Huan quipixqui huejhueyi tlancochtli tlen hierro. Huan quinhuejhuelo sequin icualancaitacahua ica itlancoch, huan tlen mocajque quintzontlamiltiyaya, huan ininpan moquejquetzayaya ica iicxihua. Yajaya eliyaya seyoc tlamantli tecuani huan ax queja ne sequinoc tlen ya niqiztoya pampa quipixqui majtactli icuacua.

Nopa cuacuajtli pilsiltzi quiixnextía se tlatcatl

8“Huan quema noja nijtlachilijtoya icuacua, niqitac para pejqui moscaltía seyoc icuacuayo tlen pilsiltzi. Huan nopa icuacuayo tlen pilsiltzi moscaltí huan quiquixtili nopa eyi icuacuayo tlen achtohui eltoya. Huan nopa cuacuajtli pilsiltzi tlen onquistoya quipixqui iixtiyolhua queja se tlatcatl huan se icamac ica tlen camatiyaya para mohueyimatis.

Itlanahuatijcayo Toteco Dios

9“Huan noja nitlachixtoya, quema pejqui quitlalíaj siyas yejyec-tzitzi para ipan mosehuisse tlanahuatiani.

Huan mosehui Yajaya Tlen Nochipa Itztoc.

Huan iyoyo eltoya chipahuac queja nextli,

huan itzoncal nojquiya chipahuac queja borrego iijhuiyo tlen tlahuel tlapajpactic.

Huan nopa siya campa mosehujtoya tlatlayaya queja se tlilelemectli, huan iruedas nopa siya nojquiya tlatlayaya.

10Huan quisayaya iixpa tlen eliyaya queja se atemitl tlen tlitl.

Huan tlahuel miyac miles elhuicac ehuan tlen elhuicac quitequipa-nohuayayaj.

Huan millones huan millones tlen tlacame ijcatoyaj iixpa.

Huan yajaya, nopa Juez, pejqui itequi, huan quitlapojque nopa libros para quitas tlen quichijtoya sesen tlatcatl.

11“Huan na noja nijtlachiliyaya huan nijcajqui mohueyimati camati nopa tlatcatl tlen elqui nopa cuacuajtli pilsiltzi. Huan noja nijtlachiliyaya quema quimictijque nopa najpa tecuani, huan quihuejhueloque itlacayo huan quimajcajque ipan tlitl para ma tlatla. 12Huan quinquixtilijque ininchicahualis ne sequinoc tecuanime, pero quincajque nochi nopa eyi ma noja itztoca se quentzi más tonali queja Toteco quiixtlalijtoya ma itztoca.

13“Na noja nijtlachiliyaya ni tlamantli tlen niqitayaya. Huan hualayaya ipan mixtli se tlen nesiayaya queja Yajaya Tlen Mocuepqui Tlatcatl. Huan yajaya yajqui campa itztoc Yajaya Tlen Itztoc Nochipa, huan itlatequipanojcahua quihualicaque ma monextiqui iixpa. 14Huan Yajaya Tlen Itztoc Nochipa quimacac Yajaya Tlen Mocuepqui Tlatcatl tequihuejcaoyotl para tlanahuatis huan miyac tlatlepanitacayotl huan chicahualistli. Huan nochi tlacame ipan nochi tlatini, huan tlacame tlen qui-

matiyayaj nochi tlajtolli ipan tlaltepectli itztoyaj ipan itlanahuatilis huan quihueyi-chijque Yajaya Tlen Mocuepqui Tlacatl. Huan itequihuejcayo para tlanahuatilis huejcahuas para nochipa, huan itlanahuatilis ax quema panotehuas, niyon ax aqui huelis quitlamiltis.

Tlen quinequi quijtos itemic Daniel

15 “Huan na niDaniel, ax nijmati tlachque nimoilhuis pampa ax nijmachilli tlen niqitayaya huan nelía nimocuesohuayaya. 16 Yeca nijnechcahui se ielhuicac ejca Toteco tlen ijcatoya nopano huan niqilhui ma nechixtomili nochi nopa tlamantli. Huan quej ni nechixtomili: 17 ‘Nopa nahui tecuanime quixnextía nahui tlanahuatiani tlen tlanahuatise ipan ni tlaltepectli. 18 Pero teipa nopa tlatzejtzeloltijca tlacame tlen iaxcahua Toteco Tlen Más Hueyi quiselise nopa tlanahuatilstli tlen ax quema tlamis huan yajuanti tlanahuatise para nochipa.’

Majtlactli tlanahuatiani

19 “Huan na noja nijnequiyaya nijmatis tlen nopa najpa tecuani tlen ax queja ne sequinoc huan ajqueya quixnextiyaya pampa tlahuel temajmatiyaya. Quipixtoya itlancoch tlen hierro, huan iisti tlen bronco tlen ica tetlamiltiyaya huan tlahuejhuelohuayaya. Huan tlen mocahuayaya ipan moquejquetzayaya ica iicxihua. 20 Nojquiya nijnequiyaya nijmatis tlen nopa majtlactli icuacua tlen quipixqui ne tecuani. Huan nijnequiyaya nijmatis tlen nopa cuacuajtli pilsiltzi tlen tlanamiqui pampa quipixtoya ixtiyoli huan se camactli tlen mohueyimati camatiyaya. Teipa icuacua pilsiltzi nesiyaya para más hueyi eliyaya que ne sequinoc huan nopa eyi cuacuajtli huetzqui iixpa para quimacase lugar. 21 Huan teipa niquitac para nopa cuacuajtli tlen pejqui pilsiltzi tlatehuyiyaya ininhuaya nopa tlatzejtzeloltijca tlacame tlen iaxcahua Toteco Tlen Más Hueyi. Huan nopa cuacuajtli quintlaniyaya 22 hasta ajsico Yajaya Tlen Itztoc Para Nochipa huan quintlajtolsencahuaco tlen xitlahuac ipampa itlatzejtzeloltijca tlacajhua Yajaya

Tlen Más Hueyi. Huan teipa ajsic hora para itlatzejtzeloltijca tlacajhua quiselise nopa tlanahuatilstli huan pehuase tlanahuatise.

23 “Huan nopa ielhuicac ejca Toteco quijto: ‘Nopa najpa tecuani elis nopa najpa tlanahuatilstli tlen oncas ipan ni tlaltepectli. Huan ax elis queja ne sequinoc pampa más fiero elis. Quixolehuas nochi tlaltepectli huan ipan moquejquetzas. Nochi quichihuas cuechtic. 24 Nopa majtlactli cuacuajtli quixnextía majtlactli tlanahuatiani tlen hualase tlen ni najpa tlanahuatilstli. Huan teipa quema tlamis inin tlanahuatijcayo nopa majtlactli, motlalanase seyoc tlamantli tlanahuatijquetl tlen ax queja yajuanti tlen achtohuiya. Huan yajaya quinmictis eyi tlen nopa majtlactli tlanahuatiani. 25 Huan nopa tlanahuatijquetl tlen nopa cuacuajtli pilsiltzi quixnextía, quimahuispolos Toteco Tlen Más Hueyi, huan quintlajiyohuiltis itlatzejtzeloltijca tlacajhua. Huan quinequis quipatlás inintlanahuatilhua huan ipan tlachque tonali oncas iniilhui. Huan itlatzejtzeloltijca tlacajhua Toteco, yajaya Tlen Más Hueyi, itztose imaco nopa tlatcatl para eyi xihuitl huan tlajco.

26 “Pero teipa mosehuis Toteco Dios, nopa Juez, huan pehuas tetlajtolsencahuas. Huan Toteco quiquixtilis itequihuejcayo nopa fiero tlatcatl tlen quixnextía nopa cuacuajtli tlen pejqui pilsiltzi. Huan Toteco quitlamixolehuas ichicahualis huan quitlamiltis para nochipa.

27 “Huan teipa nochi tlanahuatiani huan nochi tlaltini tlen tlanahuatíaj ipan ni tlaltepectli ihuaya nochi inintlatlepánitacayo huan ininhueyitilis quinmactilis nopa tlatzejtzeloltijca tlacame tlen iaxcahua Toteco Tlen Más Hueyi. Huan itlanahuatilis elis se tlanahuatilstli tlen huejcahuas para nochipa. Huan nochi tlen tlanahuatíaj campa hueli techaj ipan tlaltepectli quitequipanose huan quineltocase.’

28 “Ni nochiya tlen nijtemijqui. Huan na niDaniel, nefa nimocueso huan nimoixchipajqui, pero ax aqui niqilhui tlen ni tlamantli.”

**Nopa oquich borrego
huan nopa oquich chivo**

8 “Huan quema Tlanahuatijquetl Belsasar yohuiyaya ica eyi xihuitl tlanahuatis, na, niDaniel, nijpixqui seyoc temictli quentzi queja nopa tlen achtohuiya. 2 Huan quema nitemiQUIYAYA, niqUITAC huan niITZTOYA ipan nopa tequICALI ipan al-tepetl Susa tlen mocahua ipan nopa estado Elam. Huan niijCATOYA iteno nopa atentli Ulai. 3 Huan niAJCOITAC huan niqUITAC se oquich borrego tlen itZTOYA iteno nopa atentli. Huan nopa oquich borrego QUIPIXQUI ome icuACUA tlen huehueyAC, pero se icuACUA pejqU moscaltía teipa huan ya nopa tlen mochijqui tlen más huehueyAC. 4 Huan niqUITAC para nopa oquich borrego tlatonpojhuiyaya ica icuACUA campa temo tonati, huan ica norte huan ica sur pampa quitehuisneQUIYAYA tlatini ipa nochi ni lados. Huan niyon se ax hueliyaya ihuaya motlalis, niyon ax hueliyaya momanahuis quema quiajsiyaya pampa eliyaya nelía chicahuac huan nochi quintlaniyaya. Huan quichijqui san tlen ya quineQUIYAYA huan mochijqui nelía hueyi itlanahuatilis.

5 “Huan noja nimoilhuiyaya tlen ni-quitZTOYA quema nimomacac cuenta para hualayaya se oquich chivo campa temo tonati. Huan nelchicahuac hualayaya hasta iicxihua ax ajsiyaya tlalchi. Huan ni oquich chivo san quipiyayaya setzi hueyi cuacuajtl tlatlajco iixtiyol. 6 Huan quema ajsito campa nopa oquich borrego tlen quipiyayaya ome icuACUA tlen niquitZTOYA nechca nopa atemiltl, motlalo para quitehuis ica nochi icualancayo huan ica nochi ifuerza. 7 Huan quitlapanili nopa ome icuACUA nopa oquich borrego pampa ax quipixqui fuerza para ihuaya motehuis, niyon ax aqui hueliyaya quimanahuis tlen nopa oquich chivo tlen tetit hualajqui. Huan nopa chivo quitlanqui nopa oquich borrego huan quimajcayqui huan ipan moquejquetzqui. 8 Huan nopa chivo nelía mohueyimatqui huan mocuili noja más fuerza. Huan quema mochijtoya neltetic, postejqui icuACUA tlen hueyi huan nopano campa tlatzquitoya, quisqui seyoc nahui cuacuajtl tlen tlanextiyaya najcac pampa

ipan nochi inacastla quineQUIYAYA tlatehuiti.

9 “Huan ipan se nopa cuacuajtl quisqui seyoc cuacuajtl tlen quentzi pilsiltzi tlen moscaltli huan ontlachixtoya para tlatehuiti ica sur, huan campa quisa tonati huan campa Israel, nopa Tlali Yejectzi. 10 Huan ichicahualis quiajsic elhuicac huan yajaya ininhuaya motlali ielhuicac ejcAHUA Toteco huan quinmajcayqui sequin elhuicac ehuan huan sitlalime tlen elhuicac para tlatzintla huan ipan moquejquetzqui. 11 Huan mohueyichijqui hasta ica motlali nopa Tlayacanquetl ipan nopa Tlali Yejectzi. Huan yajaya tlen itzotc nopa cuacuajtl ayoc quincahuili itlajcAHUA Toteco ma quimacaca Toteco nopa tlaajcahualistli tlen monequi mojmotla. Huan quichijqui ax tlapajpactic nopa tiopan callitc campa quihueyichihuaj. 12 Huan mosisinyaya yajaya tlen itzotc nopa cuacuajtl, huan Toteco quicayqui itlajcAHUA imaco. Nojquiya quicahuili ma quiquetza nopa tlaajcahualistli tlen quitencahuayayaj mojmotla. Huan ne tlatatl tlen eliyaya ne cuacuajtl quicuesjcaitac tlen melahuac, huan quichijqui san tlen yajaya quineQUIYAYA, huan nochi tlen quichijqui quisqui cuali para ya.

13 “Teipa nijcayqui se ielhuicac ejca Toteco quitlatzintoquiliyaya seyoc ielhuicac ejquetl: ‘¿Quesqui tonali huejcahuas ni tlamantli tlen ya ni quiXnextía? ¿Quesqui tonali moquetztos nopa tlaajcahualistli tlen quimacaj mojmotla? ¿Quema tlamis para quichihuas nopa fiero tlaajtlocali tlen quichihuas ax tlapajpactic nopa tiopa campa quihueyichihuaj Toteco? ¿Quesqui tonali ipan quinquejquetztos itlajcAHUA Toteco?’ 14 Huan ne se elhuicac ejquetl quinanquili: ‘Quiquetzase nopa tlaajcahualistli tlen monequi temacase se ica ijnaloc huan se ica tiotlac hasta oncas 2 mil 300 tlaajcahualistli tlen ax quimacase. Teipa quena, quipajpacase nopa tlaixpamitl huan sampa quiiyocatlalise para Toteco.’

Tlen quinequi quiijtos itemic Daniel

15 “Huan quema na, niDaniel, niJtlachi-

liyaya ni tlamantli huan nijnequiyaya nijmachilis tlachque quijtosnequi, monexti noixpa se tlen nesiyyaya queja se tlatcatl. ¹⁶Huan nijcajqui itos se tlatcatl tlen hualayaya tlen campa nopa atemiltl Ulai, huan quijto: ‘Gabriel, xiquilhui ne tlatcatl tlen quitac.’

¹⁷“Huan Gabriel nechnechcahui campanimoquetzayaya. Huan nelía nimomajmati, huan nimotlancuaquetzqui huan nimohuijzonqui tlalchi, pero yajaya nechilhui: ‘Ta titlatcatl, xijmachili huan ximomaca cuenta para nochi tlen tiquitac quixnextía tlamantli tlen panos teipa quema hualas itlamiya tonali.’

**Tlen quijtosnequi itemic
elis para teipa**

¹⁸“Huan quema nechcamahuiyaya, nihuetzqui tlalchi huan tlahuel nicochqui, pero yajaya nechitzqui, huan quichijqui ma nimoquetza. ¹⁹Huan nechilhui: ‘Niitztoc nica para nimitzilhuis tlen panos teipa ipan itlamiya tonali quema oncas hueyi tlaijyohuilistli pampa Toteco Dios tenextilis icualancayo. Tlen tiquitac quixnextía tlamantli tlen panos teipa nechca quema tlamis tonali. ²⁰Nopa oquich borrego tlen tiquitac ica ome icuacua quinixnextía nopa tlanahuatiani tlen tlali Media huan Persia. ²¹Huan nopa oquich chivo pachontic, yajaya quixnextía itlanahuatilis tlali Grecia ehuan. Huan ihueyi cuacua tlen quipixqui tlatlajco iixtiyolhua quijtosnequi iniachtohui tlanahuatijca. ²²Huan nopa nahui cuacuajtli tlen quisque quema iachtohui cuacua postejqui, quinequi quijtos para ipan ni tlali motlalanase nahui tlanahuatiani ipan nahui tlanahuatijcayotl, pero ax quipiyase chicahualistli queja nopa achtohui quipixqui.

²³“Huan teipa quema ya tlantiyas inintlanahuatijcayo nopa tlanahuatiani tlen tlali Grecia huan yajuanti quichijtose tlen pano fiero, motlalanase se tlanahuatijquetl tlen ixcualantoc huan nelía tlanamiqui para tlacajcayahuas. ²⁴Yajaya mochihuas nelía hueyi huan quipiyas miyac chicahualistli, pero nopa chicahualistli ax elis ya ichicahualis. Quinoxolehuas tlatini

campa hueli hasta ax tleno mocahuas. Huan tlatlanis ipan nochi tlen yajaya quinequi quichihuas. Quintlamiltis huejhueyi tlacame huan nojquiya quinmictise miyac tlen nopa tlatzejtzeloltique tlacame tlen iaxcahua Toteco. ²⁵Pampa nopa tlanahuatijquetl itztos se tlacajcayajquetl, cuali quimatis quejatza tlacajcayahuas huan quintlanis miyac tlacame tlen ipan motemachijtose. Yajaya tlahuel mocualitas huan mohueyimatis hasta pehuas quitehuis nopa Tlanahuatijquetl Tlen Más Hueyi Que Nochi Tlanahuatiani. Pero nopano Toteco quimajcahuas yonque niyon se tlanahuatijquetl ipan tlatpeactli ax huelqui quitlanis. ²⁶Ya nimitzilhuijtoc tlen tiquitac huan quesqui tiotlac huan ijnaloc ax oncas se tlacajcahalistli, huan nochi ya ni melahuac, pero ama ax aqui xiquilhui tlen tiquitztoc. Xicajcocui ipan moyolo pampa noja polihui miyac tonali para panos.’

²⁷“Huan teipa na, niDaniel, nijmatqui para nechtlamiquixtili nochi nofuerza, huan nimococohuayaya para se ome tonali. Teipa nimotlalanqui huan noja nijpalehuiyaya nopa tlanahuatijquetl ipan itequi ipan nopa tlali. Pero tlahuel nimocuesoyaya ica nopa temictli tlen nijpaxqui pampa ax nihuelqui nijmachilía.

**Israelitame itztose 70 xihuitl
ipan sequinoc tlatini**

9 “Huan teipa Darío, tlen elqui icono Asuero huan ejqui ipan tlali Media, mochijqui tlanahuatijquetl ipan inintlanahuatijcayo calde tlacame. ²Huan ipan nopa achtohui xihuitl ipan itequi, na niDaniel, nimomachtiyaya Itlajtol Toteco ipan iama Jeremías tlen huejcajquiya elqui se itiocamanalajca Toteco Dios. Huan nopano nijpanti campa Toteco quinextilijtoya para quiaxitis 70 xihuitl para mocahuas xolejtoc altepetl Jerusalén.

**Daniel tlajtlani tlapojpolhuili
ipampa nochi israelitame**

³“Huan pejqui nimomajtohua ica Toteco Dios ica nochi noyolo huan nijtlajtlaniyaya ma quitlamilti nopa tonali tlen tla-

tzacuilitli. Huan nimosahuayaya, huan nimoyoyontiyaya ica yoyomitl tlen fiero huan nimosehuiyaya ipan cuanextli.

4“Nijtenpojqui huan nijpannexti iixpa noTECO Dios nochi notlajtlacolhua huan nochi notlacajhua inintlajtlacolhua. Huan quej ni niquilhui:

“¡Ay Toteco! Ta tlen tlahuel tihueyi huan tlahuel titemajmati. Axaca seyoc queja ta. Nochipa titechicnelía queja timocajtoc para tijchihuas nochi tojuanti tlen timitzicnelíaj huan tlen tijchihua motlanahuatilhua. ⁵Pero tlahuel miyac titlajtlacolchijtoque moixpa huan tlahuel titlaixpanotoque moca ta. Timotzontetiliytoque huan tijtlahuelcajtoque motlanahuatilhua huan motlajtol. ⁶Ax tiquinchihuilijque cuenta motlatequipanojcahua, nopa tiocamanalohuani tlen ta titechtitlanili para ma technojnatzaca. Yajuanti ajachica hualayayaj huan quinpohuiliyayaj tohuejcapan tatahua, totequiticahua huan totlanahuatijcahua tlen ta. Quena, quinpohuilihtihualayayaj nochi tiisraelitame tlen ta.

7“Toteco, ta nelía tixitlahuac, pero tojuanti tiisraelitame, nelía tiitztoque se pinahualistli pampa titlajtlacolchijtoque. Quena, timopinahuaj tiisraelitame tlen tiehuani altepetl Jerusalén, huan nochi tlali Judá, huan nochi nopa tlali Israel. Techpinahualtía nochi tlen ax cuali tijchijtoque nochi tiisraelitame yonque tiitztoque nechca total o huejca ipan tlen hueli tlali campa titechhuicatoque ipampa totlajtlacolhua. ⁸Quena, TOTECO, miyac tipinahua moixpa nochi tojuanti hasta totlanahuatijcahua, totequiticahua huan tohuejcapan tatahua pampa titlajtlacolchijtoque miyac ica ta. ⁹Pero ta, TOTECO Dios, titeblasojtla huan titetlapojpolhuía yonque quichijtoque tlen fiero moixpa. ¹⁰Pero tojuanti ax tijchihuilijque cuenta tlen titechilhui, TOTECO, niyon ax tijtoquiliytoque motlamachtli tlen titechmacacica motiocamanalojcahua. ¹¹Nochi tiisraelitame tiquixpanotoque motlanahuatilhua huan timoiyoqaquixtijtoque,

huan ax timitzneltoquiliyque tlen titechilhui. Yeca huetztoc topani nopa tlatelchihualistli tlen ijcuiliytoc ipan itlanahuatilhua Moisés, motlatequipanojca, pampa miyac titlajtlacolchijque ica ta. ¹²Huajca ta Toteco, tijchijtoc tlen titechilhui huan tlen tiquinilhui tolayacancahua tlen technahuatiyayaj para tijchihuasquía. Ta titechhualiquili ni cuesoli tlen nelía hueyi, pampa ax quema oncatoya ipan tlattepectli seyoc tlamantli san se quej ni tlatzacuilitli tlen huetztoc topani tiJerusalén ehuan. ¹³Eltoc senquistoc queja ijcuiliytoc ipan itlanahuatilhua Moisés. Nochi ni tlaijiyohuilistli hualajtoc topani, pero ax timitztemojtoque para tijchihuase mopaquilis, TOTECO Dios. Ax tijcajteytoque totlajtlacolhua para tijtemose tlen melahuac. ¹⁴Yeca, TOTECO, ta titechsencahuilijtoc ni tlatzacuilitli. Huan tijtitlantoc topani pampa ta tixitlahuac huan xitlahuac nochi tlen tijchijtoc. Pero noja ax timitztlacaquiliytoque.

15“Toteco Dios, ta huejcajquiya ica mohueyi chichualis tiquinquixti motlacajhua ipan tlali Egipto, huan yeca nochi quicactoque tlen ta campa hueli. Ama sampa ximonexti huan xitechpalehui pampa titlajtlacolchijtoque huan tijchijtoque tlen fiero. ¹⁶Yeca, Toteco, queja quinamiqui ica nochi tlen xitlahuac tijchijtoc, xijchihua se favor xiquijcueni mocualancayo ipan moaltepe Jerusalén. Ayoc xicalani tohuaya tlen nopano tiehuani pampa ya nopa moaltepe tlatzejteloltic. Huan ama ipampa totlajtlacolhua huan inintlajtlacolhua tohuejcapan tatahua, nochi tlaltini nejnechca ica paquij moaltepe Jerusalén huan toca paquij tojuanti timotlacajhua.

17“Toteco Dios, ama xijtlacaquili ni notlamajtol nimotlatequipanojca. Xijchihua cuenta tlen nimitztlajtlanía para tlacame sampa ma mitzhueyimatca. Xijtlasojtla motiopa pampa mocajqui xolejtoc, huan sampa xijcualltali. ¹⁸¡Ay Toteco Dios! Xijtlacaquili huan

xijchihuili cuenta tlen nimitztlatlanía. Cualí xijtlachili tlen ipantitoc huan queja quicajtoque nopa altepetl tlen nochi quimatij para moaxca. Ax timitztlajtlaníaj xitechpalehui pampa ticuaj-cualme, pampa ax neli, pero timitztlajtlaníaj pampa nelía hueyi moyolo.

19 “¡Ay Toteco, xinechtlacaquili! ¡Ay Toteco, xitechtlapojpolhui! ¡Ay Toteco, xijcaqui notlajto! Xijchihua tlen nimitztlatlanía huan amo xihuejcahua para xitechpalehuis. Nochi tlacame sampa ma quitaca mohueyitilis pampa nochi quimatij para Jerusalén moaltepe huan tiisraelitame timotlacajhua.”

**Panos 490 xihuitl hasta monextis
nopa Mesías**

20 “Huan nimomaijtohuayaya huan iix-pa TOTECO Dios nijpannextiyaya notlajtlacolhua huan inintlajtlacolhua notlacajhua, nopa israelitame. Huan nijtlajtlaniyaya Toteco Dios ma techilnamiqui huan ma quiilnamiqui ialtepe tlen tlatzejtzeltic. 21 Huan nechca nopa hora ica tiotlac quema monequi quimacase itlacajcahualis Toteco quema noja nimomaijtoyaya, patlantihualajqui tlen Toteco nopa elhuicac ejquetl tlen itoca Gabriel huan ajsico campa na niitztoya. Yajaya tlen niquitztoya achtohuiya ipan se temictli. 22 Huan Gabriel nechilhui:

“Daniel, ama nihualajtoc para nijchihuas xijmachili cuali tlen panos teipa. 23 Quema tijpehualti timomaijtohua, Toteco Dios nechnahualti tlachque ma nimitzilhuiqui. Huan na ama nihualajtoc para nimitzilhuis tlen Toteco quichihuas ica motlacajhua. Yajaya quinequi xijmati pampa tlahuel mitzicnelía. Huajca ama, xijtlacaquili cuali tlen nimitzilhuis para huelis tijmachilis tlen teipa oncas ipan itlamiya tonali huan tlen eltoya ipan nopa temictli.

24 “Toteco tlanahuatijtoc para motlatzejtzeltitjca altepe huan motlacajhua ma tlaijiyohuica para 490 xihuitl más o para ma panoca 7 xihuitl 70 hueltas. Ica ya nopa, motlacajhua quicajtehuase inintlajtlacolhua huan ayoc

quichihuase tlen fiero. Huan Toteco quinpojpoahuilis inintlaixpanolhua. Teipa ipan tlattepaactli pehuas nopa tlanahuatistli campa nochi elis xitlahuac huan nopa tlanahuatistli huejcahuas para nochipa. Nopano motlamichihuas nochi tlen itiocamanalojcahua Toteco quijtojoque. Huan ipan nopa tonali, quialtis ica aceite para quitequitlalis Yajaya Tlen Tlahuel Tlatzejtzeltic senquistoc queja itiocamanalojcahua Toteco huejcajquiya quijtojque para panos.

25 “Huajca xijtlacaquili. Intra se pehuas quipohuas sesen xihuitl tlen quema temacase nopa tlanahuatili para sampa ma quisencahuaca altepetl Jerusalén, elis 49 xihuitl o 7 xihuitl panos 7 hueltas. Huan teipa elis seyoc 434 xihuitl o 7 xihuitl panos 62 hueltas hasta quema ajsis nopa Mesías, nopa tlanahuatijquetl tlen Toteco Dios quijto techtitlanilisquía. Huan sampa quisencahuase Jerusalén ica icalles huan tepamitl, yonque ohui para quichihuase.

26 “Huan teipa quema ya panotos nopa 434 xihuitl, quimictise nopa Mesías huan nesis queja ax tleno quiipiya. Teipa hualase isoldados nopa fiero tlanahuatijquetl tlen tiquitac ajsico para quixolehuaquij Jerusalén huan itiopa Toteco. Huan quema hualase, elis queja quema hualas tlahuel miyac atl tlen nochi tloxolejtiquisa. Huan teipa panos tlen quijtojoque itiocamanalojca Toteco. Oncas tlathueijcayotl huan tloxolehualistli hasta itlamiya. 27 Ni fiero tlanahuatijquetl quisencahuas se tlajtoli ica miyac tlacame para chicome xihuitl, pero quema ajsis itlajcoyo nopa chicome xihuitl, moyolcuepas ica tlachque quijto huan tlanahuatis para israelitame ma ayoc temacaca tlacajcahualistli para Toteco. Ax quincahuilis quimacase Toteco tlacajcahualistli tlen tlapiyalime, niyon tlen harina. Huan ax san ya nopa quichihuas, nojquiya quitlalis campa tlaixpamitl ipan tiopamitl se tlamanli tlen fiero tlen nochi quijiyase. Huan nopa tlen quitlalise quichi-

huas nopa tiopamitl senquistoc ax tlajpactic iixpa Toteco. Pero Toteco ya quijtojtoc para quitzontlamitlis nopa fiero tlatatl ipampa tlen quichihuas ipan itioapa.”

**Daniel quitac se tlatatl
ica itlatlanex**

10 Huan quema Tlanahuatijquetl Ciro yohuiyaya para eyi xihuitl tlanahuatis ipan tlali Persia^a, Toteco nechmacac na, niDaniel, tlen nojquiya notoca Beltsasar, seyoc tlanextili. Huan nopa tlajtoli tlen nijseli elqui melahuac. Nechpohuili tlen se hueyi tlatehujicayotl tlen hualas ipan itlacajhua Toteco. Huan nijmachili tlachque quinequi quijtos.

²Huan quema nijseli nopa tlanextili, na niDaniel, nimocueso para eyi samano huan nijtemo Toteco. ³Ax nijcuajqui pantzi tlasasaltili, niyon ax nijyeco nacatl, niyon xocomeca atl. Niyon ax nimotlalili niyon se tlaajhuiyacayotl hasta quema panoc nopa eyi samanos.

**Hualajqui se ielhuicac ejca Toteco
tlen elhuicac**

⁴Huan ica ijnaloc ipan 24 itequi nopa achtohui metztlil ipan toisraelita calendario^b, nijcatoya iteno nopa hueyi atemiltl tlen itoca Tigris. ⁵Huan nitlachixqui huan niquitac se tlatatl tlen moyoyontijtoya ica nopa cuali yoyomitl itoca lino huan quipixtoya itlajcoilpica tlen senquistoc oro tlen más cuali. ⁶Itlacayo nopa tlatatl petlaniyaya queja nopa piltetzi tlen patiyotl tlen itoca topacio. Ixayac petlaniyaya queja quema tlapetlani huan iixtiyol nesiyyaya queja tlixochitl. Ima huan imetz petlaniyaya queja bronce tlen quitlalijtoya ipan tilitl huan teipa quipojpojtoyaj miyac hasta nelía cahuani. Huan quema nijcajqui itos, eliyaya queja miyac tlacame tlen tlachelchihuaj chicahuac.

⁷Huan san na, niDaniel, niquitac nopa tlanextili, pero nopa tlacame tlen itztoyaj nohuaya ax quitaque, san quinajsic se hueyi majmajtli huan motlalojtejque huan

motlatitoy. ⁸Huajca na niitztoya noselti quema niquitac ni hueyi tlanextili. Huan quema niquitac, niixchipahuixqui huan niyamanixqui. Nelía nimomajmati huan tlanqui nofuerza. ⁹Huan quema nijcajqui tlen camatqui, nihuetzqui ica noxayac tlatlchi huan tlahuac nichochqui.

¹⁰Huan se nechitzqui ica ima huan nechtlalanqui hasta huelqui nimanejniqui tlatlchi. ¹¹Huan nechilhui: “Daniel, Toteco tlahuac mitzicnelía. Ximoquetza huan ixtlacaquili cuali tlen nimitzilhuic pampa nechtitlantoc ma nimitzitaqui.”

**Para tlen huejcajqui para huala
nopa elhuicac ejquetl**

Huan quema queja nopa nechilhui, na nimoquetzqui noja nihuihuipicayaya. ¹²Huan yajaya nechilhui: “Amo ximajmahui, Daniel, pampa hasta nopa achtohui tonal quema pejqui timosahua huan timoicnonejqui iixpa Toteco Dios quitlacaquili motlamajtol. Huan pampa tijnequiyaya tijmachilis nopa tlamantli tlen ohui, Toteco Dios nechhualtitlanqui ma nihuala. ¹³Pero nopa ax cual ajacatl tlen quiyiya tlanahuatili ipan nopa tlanahuatilitli tlen Persia nechojtzajqui huan nechtehuico para 21 tonali. Pero Miguel, se hueyi tlayacanquetl tlen ielhuicac ejcahua Toteco nechpalehuico pampa niitztoya noselti ihuaya nopa ax cual ajacatl tlen quiyiya tlanahuatili ipan tlali Persia. ¹⁴Pero ama niajsitoc para nimitzilhuic tlen quinpanos motlacajhua ipan itlamiya tonali. Pampa nopa tlen tiquitztoc quixnextía tlen polihuiyoc tlahuac miyac xihuitl para panos.

**Nopa elhuicac ejquetl
quifuerzamamac Daniel**

¹⁵“Huan quema nijcajqui tlen nechilhuiyaya, na nisentlachixtoya tlatlchi, niyon ax hueliyaya niquijtohua niyon se tlajtoli. ¹⁶Teipa se tlen nesiyyaya queja se tlatatl quitoxonqui notencuetlaxo. Huajca nihuelqui nicamatqui huan niquilhui tlen itztoya noixpa: ‘Tata, nopa tlen niquitztoc para quinajsis noisraelita teixmatchahua,

^a10:1 Ipan 536 a.C.

^b10:4 Ipan 23 itequi abril, 536 a.C.

nelía nechylcocojtoc hasta ayoc nijpiya fuerza. ¹⁷¿Quejatzá huelis na, nimotlate-quipanojca, nimitzcamahuis quema ax nijpiya fuerza huan ta nelía tihueyi? Niyon ax nihueli nitlajiyotilana.’

¹⁸“Huajca yajaya tlen nesiyya queja titlacajme sampa nechitzqui huan nechmacac fuerza. ¹⁹Huan nechilhui: ‘¡Amo ximajmahui! San ximoyoltlali pampa Toteo Dios tlhuel mitzicnelía. Ximotemaca huan ximotetili.’

“Huan quema noja nechcamahuiyaya, nijmatqui para nijpixtiyajqui fuerza, huan niqijto: ‘Tata, xinechnojtza ama pampa ya tinechfuerzajmacac.’

²⁰⁻²¹“Huajca nechilhui: ‘Nimantzi mo-nequis nimocuepas nijtehuis nopa ax cual ajacatl tlen quiyiya tlanahuatili ipan tlali Persia. Huan quema nimotehuiti ihuaya, nojquiya hualas nopa ax cual ajacatl tlen tlanahuatía ipan tlali Grecia para quipalehúis. Huan quema nimotehúis ininhuaya, san Miguel, nopa elhuicac ejquetl tlen quinmocuítlahuía israelitame, itztoz nopano para nechpalehúis. Pero achtohui nimitzilhúis tlen ijcuilijtoc ipan nopa Amatljacuiloli Tlen Melahuac, pampa yeca nihualajtoc.

1 “Na nojquiya nijfuerzajmacac huan nijpalehui nopa elhuicac ejquetl Miguel ipan iachtohui xihui tlen itequi Darío queja tlanahuatijquetl ipan tlali Media. ²Huan ama nimitznextilis tlen melahuac.

Tlen pano quema tlanahuatijayaj

Persia ehuaní

“Itztoze eyi más tlanahuatiani tlen tlanahuatise ipan tlali Persia. Teipa oncas se-yoc tlanahuatijquetl tlen ica elis nahui. Huan nopa najpa tlanahuatijquetl moricojchihuas hasta quinonpanos tlen quipixque nopa achtohui eyi tlanahuatiani. Huan quema mochihuas nelía tetic ipampa itomi, quinajcomanas nochí tlacame ipan itlanahuatilis para ma quitehuijtiyaca tlali Grecia.

Tlen panoc quema

tlanahuatijayaj Grecia ehuaní

³“Pero teipa nopano ipan tlali Grecia,

motlalanás se tlatatl para mochihuas tlanahuatijquetl huan yajaya quiyiyas miyac chicahualistli huan quinnahuatis tlhuel miyac taltini. Quichihuas san tlen ya quin-nequis. ⁴Pero quema ya moaxcatijtos miyac taltini, nopa taltini ipan itlanahuatilis mococototzase. Huan itlanahuatilis monajcáitas, huan mochihuas nahui tlanahuatistli; se ica sur, se ica norte, se campa quisa tonati huan se campa temo tonati. Huan niyon se nopa tlanahuatistli ax quiyiyas chicahualistli queja quipixqui quema san se eliyaya. Huan ax quiselis tlanahuatili niyon se icone nopa hueyi tlanahuatijquetl para tlanahuatis ipan se tlen nopa nahui taltini. Sequinoc nahui tlanahuatiani quiselise.

Tlanahuatijquetl tlen tlali Egipto

⁵“Huan se tlen nopa nahui, yajaya tlen tlanahuatía ipan Egipto ica sur, mohueyichihuas. Pero teipa se itlapalehuijca tlen quihuica tequihuejcaoytl ihuaya moajcomanas ica ya huan mocuilis itlanahuatilis. Huan teipa yajaya tlen mocuilí itlanahuatilis quiyiyas más chicahualistli que tlen tlanahuati achtohui. ⁶Teipa ica se ome xihuitl, nopa tlanahuatijquetl tlen sur huan nopa tlanahuatijquetl ica norte quisencahuase se tlajtoli. Huan nopa tlanahuatijquetl ica sur quimacas nopa tlanahuatijquetl ica norte iichpoca para ma monamicti ihuaya. Moilhúis para queja nopa moyoltlalise nopa ome taltini. Pero ax quisas cuali quema monamictise. Seyoc quinmictis nopa ichpocatl ihuaya itlatequipanojcahua tlen ihuaya yajque quema monamicti. Nojquiya quimictise icone tlen nopano tlatatis. Huan nojquiya quimictise nopa tlanahuatijquetl tlen ihuaya monamicti huan tlen eliyaya itata nopa conetl. Yeca ax quisas tlen moilhúiyaya quisencahuas itata nopa ichpocatl, yajaya tlen tlanahuatijquetl ica sur. Yajaya moilhui para se tonal tlanahuatis campa norte se iixhui tlen quitlacatiltisquía iichpoca, pero axtle. Teipa nojquiya miquis nopa tlanahuatijquetl ica sur.

⁷“Huan itelpoca nopa tlanahuatijquetl ica sur, yajaya tlen iicni nopa ichpoc-

catl, mochihuas tlanahuatijquetl campa eltoya itata. Huan ya ininhuaya isoldados quitehuitij yajaya tlen teipa mochihuas tlanahuatijquetl ipan norte. Huan iicni nopa ichpocatl quiixpanos nopa tepamitl tlen ica quitzacua nopa tlanahuatijquetl ica norte, huan yajaya tlatlanis pampa quiipiyas miyac chicahualistli. ⁸Teipa quinixtequilis ininteteyohua tlen quichijtoque ica tepostli huan nojquiya quinixtequilis tlen pajpatiyo quipixtoque tlen quichijtoya ica oro huan plata. Nochi ni tlamantli quihualicas ihuaya quema mocuepas ichaj ipan tlali Egipto. Teipa nopa tlanahuatijquetl ica sur ayoc sampa quitehuiti nopa tlanahuatijquetl ica norte hasta panos quentzi xihuitl.

Nopa tlanahuatijquetl tlen norte

⁹“Pero teipa nopa tlanahuatijquetl ipan norte quinequis quitehuis tlali Egipto campa mosehuía nopa tlanahuatijquetl ica sur, pero ax tleno huelis quichihuas huan monequis mocuepas sampa campa hualajqui. ¹⁰Pero itelpocahua nopa tlanahuatijquetl ica norte quinsentilise miyac ininsoldados para se tlathuijcaoyotl. Huan se itelpoca ica isoldados motlalanas huan tetzontlamiltijtihualas queja tlahuel miyac atl hasta quinequise quitehuitij nopa tlanahuatijquetl ica sur hasta icalixpa nopa cali tlen quisencajtoque tlahuel tetic.

¹¹“Huan nopa tlanahuatijquetl ica sur ipan tlali Egipto nelía cualanis huan quisas para quitehuiti icualancaitaca tlen norte tlen quinamiquiqui ica tlahuel miyac soldados. Huan yonque nelía miyac isoldados hualahuj tlen norte, yajaya tlen tlali Egipto quintlanis. ¹²Huan quema nopa tlanahuatijquetl ica sur tlatlanis huan quiitas para miyac icualancaitacahua tepetoque, nelía mohueyimatis huan quinmictise noja más miyac tlacame, pero ichicahualis ax huejcahuas. ¹³Huan ica se ome xihuitl nopa tlanahuatijquetl tlen norte sampa quincualtlalis noja más miyac isoldados que achtohuiya. Huan quiipiyase tepostli tlen noja más cuali huan sampa hualas quitehuiqui nopa tlanahuatijquetl ica sur ipan tlali Egipto.

¹⁴“Quema ya ni panos, sequinoc tlatlani campa itztoque icualancaitacahua ne tlanahuatijquetl ica sur nojquiya motlalanase huan quitehuiquij. Hasta sequin israelitame tlen fierojtike mosejcotilise ihuaya tlen huala tlen norte senquistoc queja tiquitac ipan nopa tlanextili para quitehuise Egipto ehuan. Pero ax cualquisas tlen quichihuase. ¹⁵Huan teipa nopa tlanahuatijquetl tlen norte hualas huan quiyahualos huan quitzajtzacuas se altepetl ipan tlali Egipto tlen quiipiya se tepamitl. Queja nopa quitlanis, huan niyon isoldados tlen más cuali tlen iaxca nopa tlanahuatijquetl tlen tlali Egipto ax huelise moquetzase iniixpa inincualancaitacahua pampa ax quiipiyase fuerza.

¹⁶“Huan nopa tlanahuatijquetl tlen norte quichihuas tlen ya quinequis, huan axaca huelis ihuaya motlalis. Nojquiya hualas nopa tlanahuatijquetl tlen norte huan mosehuis ipan Israel, nopa Tlali Yeyyetzzi, huan quiipiyas chicahualistli para quixolehuas. ¹⁷Pero nopa tlanahuatijquetl tlen norte moilhuis para hualas ica nochi isoldados huan ichicahualis tlen quiipiya ipan nochi itlanahuatilis huan quisencahuas se tlajtoli ihuaya itlanahuatijca tlali Egipto. Nojquiya quimacas iichpoca para monamictis ihuaya pampa moilhuis ica itlapalehuil iichpoca huelis quitlanis huan quixolehuas nopa tlanahuatistli tlen sur ipan Egipto. Pero nopa ichpocatl ax motemacas para quipalehuis itata, niyon ax moquetzas ihuaya, huajca ax quisas tlen moilhujtoc. ¹⁸Teipa nopa tlanahuatijquetl tlen norte quitehuiti nopa altepetini iteno nopa hueyi atl huan yajaya quintlanis miyac altepetini. Pero se tlayacanquetl tlen soldados tlen huala sejcoyoc hualas para quiquetzas tlen quichihuayaya. Quitojtocas para campa hualajqui huan tlahuel quipinahualtis. ¹⁹Teipa quistehuas para sampa mocuepas itlal campa cuali tzactoc, pero ipan iojhui quipantis se tlenijqui huan ayoc aca quicauquis tlen ya.

²⁰“Huan seyoc pehuas para tlanahuatistli ipan nopa tlanahuatistli ipan norte. Huan ni tlen yancuic quintitlanis tlacame

ma tlanamatij impuesto campa hueli para huelis onpano moricojchihuas yajaya huan nochi itlanahuatilis. Pero yajaya ax huejcahuas tlanahuatis. Miquis, pero ax miquis ipan tlatehujicayotl o ipan se cualantli.

Itlanahuatijcayo nopa cuacuajtli pilsiltzi

21 “Teipa pehuas tlanahuatis ipan nopa tlanahuatistli ica Norte se tlatcatl tlen nelia fiero iyolis. Ax quitocarohua nopa tlatcatl para elis tlanahuatijquetl, niyon ax quinamiqui quipiyas nopa tlatlepanitacayotl. Nopa fiero tlatcatl hualas quema ax aqui quichiya huan mocuilis nopa tlanahuatistli pampa quimati quejatza tlaacajyahuas. 22 Quintlamiltis nochi ininsoldados icualancaitacahua huan nojquiya quimictis yajaya tlen itztoc tlayacanquetl tlen nopa acuerdo ica Toteco. 23 Yonque tlacame quichihuase se tlajtoli ihuaya ni tlen fiero tlanahuatijquetl para ma quipiyaca tlashuilstli, quincajyahuas huan quintlanis, yonque ax quinpiyas miyac soldados ihuaya. 24 Quema ax aqui quichiya para hualas, nopa fiero tlatcatl tlen norte calaquis campa itztoque tlen más yolchicajtoque ipan itlal. Quichihuas tlen ax quichijqui niyon se ihuejcapan tata. Quinixtequilis ininricojo huan quinmoyahuilis itlatoquilijcahua. Teipa pehuas quinte huiti altepetini tlen quipiyaj inintepa tlen tlahuel tetic, pero san huejcahuas se tlahlochtli.

25 “Ni fiero tlanahuatijquetl motemacas para hualas ica miyac soldados para quitehuiqui nopa tlanahuatijquetl ica sur ipan tlali Egipto. Huan nojquiya nopa tlanahuatijquetl tlen Egipto motlalanis ica miyac soldados huan pehuas tlatehuis, pero ax tlatlanis yajaya tlen Egipto. Sequinoc mosencahuase san sejco para quitlanise huan quena, quitlanise. 26 Elise nopa tlacame tlen nopa tlanahuatijquetl ica sur quinnotzas ma tluatij ihuaya ipan imesa tlen quichihuase para ma miqui. Quena, quintlanise isoldados huan miyac miquise. 27 Huan yonque ni tlanahuatijquetl tlen sur mosehuj para tluacas ihuaya ne seyoc tlayacanquetl ipan san se mesa, moistlacahuise se ica seyoc huan san moyolil-

huise tlen fiero mochihuilise. Pero tlen yajuanti moilhuíaj, ax panos. 28 Huan nopa tlanahuatijquetl tlen huala tlen norte quisas para mocuepas itlal ica miyac tlanantli pajpatiyotl tlen mocuilis ipan tlatehujicayotl. Pero pampa quincocolía nopa israelitame ipampa nopa tlajtoli tlatzejtzeltic tlen Toteco quinmacac, achtohui quipantiyas tlali Israel huan quitlamichihuas nopano nochi tlen fiero moilhujtoya quichihuas. Teipa mocuepas itlal.

29 “Huan quema ajsis hora, yajaya tlen norte sampa hualas ica isoldados para quitehuiqui Egipto, nopa tlali ica sur, pero ni huelta ax tlatlanis queja achtohuiya. 30 Pampa hualase soldados tlen altepetl Roma ipan barcos huan quinte hujquij isoldados. Huan nopa tlanahuatijquetl tlen norte ihuaya ininsoldados nelia majmahuise huan cholojtehuase para inintal. Pero pampa pinajtoc huan pampa quicocolía nopa tlajtoli tlen Toteco quisencajtoc ica itlacajhua, nopa tlanahuatijquetl tlen norte calaquis tlali Israel para quichihuas tlen fiero quinequis. 31 Huan isoldados quichihuase ax tlapajpactic itiopa Toteco Dios huan nochi nopa tepamitl tlen quichihua más temachtli. Huan yajaya quichihuas se yancuic tlanahuatili para ma ayoc quimacaca tlaacajhualistli Toteco queja nopa tlanahuatili tlen huejcajquiya quijto monequi ma quichihuaca mojmotla. Huan teipa quiquetzas se tlanantli tiopan calijtic tlen nochi tlacame quijiyaj. Quej ni quichihuase itiopa Toteco senquistoc ax tlapajpactic iixpa. Huan yajaya quin-temos nopa fiero israelitame tlen quitlahuelcajjetose nopa acuerdo ica Toteco huan quinmacas tequihuejicayotl. 32 Huan nopa fiero tlanahuatijquetl tetlayejyectlalis ica itlajtol huan quinnotzas nopa israelitame tlen quixpanoj nopa acuerdo huan quinilhuis ma quichihuaca noja más fiero. Pero nopa israelitame tlen quixmatij inin- Teco Dios quipiyase chicahualistli huan motemacase para quichihuase tlen cuali.

Israelitame tlaijyohuijque miyac

33 “Nopa tlacame tlen tlanamiquij quinmachtise miyac tlacame tlen cuali. Pero fiero tlacame motlalanase huan quin-

huicase sequin nopa cuajcualme ilpitoque para ma quintequipanoltica san tlapic, huan sequinoc nopa cuajcualme quinxtequulise nochi tlen quipiayaj. Miyac cuajcualme quinmictise o quintlatise, pero ni tlaijiyohuilistli ax huejcahuas miyac tonali. ³⁴Teipa quema miyac tlacame tlaijiyohuijtose, hualase tlen quinpalehuise se quentzi. Pero nojquiya sequinoc san mochihuase para mosejcotilise ininhuaya para quincajcayahuase. ³⁵Sequin yajuanti tlen tlanamiquij nojquiya huetzise ipan tlaijiyohuilistli. Quej ni panos para más quinyejyecos tlen quitoquilíaj Toteco para ma elica nelía tlapajpactique iixpa. Queja nopa elis hasta ajsis nopa hora quema tlen Toteco quiixtlalijtoc para tlamis.

**Nopa cuacuajtli pilsiltzi monextis
ipan itlamiya tonali**

³⁶“Huan teipa ajsis se tlanahuatijquetl tlen quichihuas nochi tlen ya quinequis. Nelía mohueyimatis hasta moilhuis para más hueyi que Dios huan nochi tlamantli tlen tlacame quinitaj queja dioses. Huan tlhuel quitlajilhuis Toteco Dios tlen más hueyi que nochi sequinoc tlen quintocaxtíaj dioses. Huan nochi tlen nopa fiero tlanahuatijquetl quichihuas quisas cuali hasta tlamis nopa tonali tlen Toteco quiixtlalijtoc para cualantli huan tlaijiyohuilistli. Pampa tlen Toteco quiijtojtoc para panos, ya nopa monequi panos. ³⁷Huan ni fiero tlanahuatijquetl ax quichihuas cuenta inindios ihuejcapan tatahua, niyon nopa dios tlen sihuame quinequij, pampa ax quitlepanitas niyon se. Yajaya san mohueyimatis huan moilhuis para más hueyi ya que nochi tlen tlacame quinitaj queja dios. ³⁸Yajaya san quiitas para ipati ichichualis huan isoldados tlen ica hueli moaxcatis tlen onca. Para ya idios elis chicahualistli, se dios tlen itatahua ax quiixmatque. Huan yajaya quixolehuas nopa oro, plata, piltetzitzi tlen pajpatiyo huan ihueyi ricojyo ipan itesoro para noja más quipiays fuerza. ³⁹Yajaya quinteheus taltini tlen más chicahuac ica itlapalehuica se dios tlen huala sejoyoc. Nojquiya ni fiero tlanahuatijquetl quin-

hueyitlalis tlacame tlen san ya quihueyichihuj. Quintlalis ma quinnahuatica miyac tlacame huan quinmajmacas tlali queja se tlaxtlahuili.

⁴⁰“Quema ajsis itlamiya tonali, nopa tlanahuatijquetl ica sur quinequis quitehuis ni fiero tlanahuatijquetl, huan nopa tlanahuatijquetl tlen norte nojquiya hualas huan ihuaya motlalis ni tlen fiero. Huan yajaya tlen norte hualas para quitehuis ica llatehujca carros para llatehujcayotl huan ica miyac cahuayojme tlen momajtoque nemij ipan llatehujcayotl huan ica miyac barcos ipan hueyi atl. Nopa fiero tlanahuatijquetl calaquis ipan miyac taltini huan quintlanis queja tlaxolejtihuala tlhuel miyac atl tlen nochi quise-manas. ⁴¹Yajaya nojquiya calaquis ipan tlali Israel, nopa Tlali Yeyectzi. Nojquiya quintlanis sequinoc taltini campa hueli, pero ax tleno quinchihuilis tlacame ipan tlali Edom huan Moab pampa mochololtise imaco. Nojquiya ax quincocos nopa tlacame ipan pano tlajco nopa tlali Amón. ⁴²Teipa quinteheus huan moaxcatis miyac taltini huan niyon Egipto ax momanahuis. ⁴³Ni fiero tlanahuatijquetl quitlanis nochi ricojyotl ipan tlali Egipto tlen eltoc tlen oro huan plata, huan nochi tlamantli yeyectzi tlen quipiya. Huan teipa san se quichihuas ipan taltini Libia huan Etiopía. ⁴⁴Pero teipa ni fiero tlanahuatijquetl mocuesos quema quicaquis tlajtoli tlen hualas tlen taltini campa quisa tonati huan campa norte. Huajca yajaya quisas nelía cualantoc huan tlhuel tlaxolejtiyas huan temictijtiyas. ⁴⁵Huan ni fiero tlanahuatijquetl quiquetzas icaltlanahuatil ipan nopa altepetl tlatzejtzeloltic huan yeyectzi, tlatlajco nopa ome huejhueyi atl. Pero nopano ajsis ihora para miquis huan ax aqui itzots para quipalehuis.

**Nopa hueyi tlaijiyohuilistli
tlen hualas**

12 “Huan ipan nopa tlaochtli Miguel, nopa hueyi elhuicac ejquetl tlen quinmocuítlahuía moisraelita tlacajhua motlalanas para quinpalehuis. Ipan nopa tonali oncas tlaijiyohuilistli tlen más

hueyi que oncac hasta quema pejqui tlaltepactli. Huan quema ajsis nopa tlalochtli, Toteco quinmaquixtis nochi motlacajhua tlen quipiyaj inintoca ijcuilijtoc ipan nopa libro.

Quejatza moyolcuise israelitame teipa

2“Huan miyac israelitame tlen mictoque huan quintalpachojtoque, motlalana-se. Sequin para itztotij para nochipa ipan nopa yolistli tlen ax quema tlamis, huan sequinoc para quipantise pinahualistli huan tlaijiyohuilistli tlen ax quema tlamis. 3Pero tlanamijca tlacame tlahuise chicahuac queja sitlalime ipan elhuicac. Quena, tlacame tlen tenextilijque nopa ojtli xitlahuac tlahuise queja sitlalime para nochipa.

**Xicajcocui ni amatlapohuali
huan tlen quiijtohua**

4“Pero ta, Daniel, xijtzacua nochi ni tlajtoli ipan molibro huan xijtlalili se sello hasta ajsis itlamiya tonali. Ipan nopa tonali miyac tlacame nentinemise nica huan neca. Huan momiyaquilis miyac tlamatlistli.’

5“Huan na, niDaniel, nitlachili ipan nopa tlanextili huan niqunitac seyoc ome elhuicac ehuan ijcatoyaj, se ipan ni nali nopa atemitl, huan seyoc ipan ne seyoc nali. 6Huan se tlen yajuanti quitlatzintoquili yajaya tlen moyoyontijtoya ica lino yoyomitl tlen itztoya iixco nopa atemitl: ‘¿Quesqui tonali elis para tlamis nochi ni tlamantli tlen temajmati?’

7“Huan nijcajqui nopa tlatatl tlen moyoyontijtoya ica lino yoyomitl quitlalanqui ima para elhuicac huan quitestigoj-quetzqui iixpa Toteco Dios tlen voltoc para nochipa, huan quiijto: ‘Quema ya quin- quixtilijtose ininchicahualis itlacajhua Toteco, elis noja eyi xihuitl huan tlajco.’

8“Huan na nijcajqui tlen quiijtohuaya-ya, pero ax tleno nijmachili. Huajca nijtlatzintoquili: ‘¡Tata! ¿Tlachque panos teipa quema tlamis nochi ni tlamantli?’

9“Huan yajaya nechnanquili: ‘Xiya ipan moojhui, Daniel, pampa ni tlamantli monequi motlatijtos hasta ajsis itlamiya tonali. 10Miyac tlacame panose ipan nopa hueyi tlaijiyohuilistli huan teipa elise tlapajpactique, tlayejyectilme huan chipahuaque iixpa Toteco. Pero yajuanti tlen fierojtique noja más fiero quichihuase. Niyon se tlen fiero ax quimachilis tlen quiijtosnequi ni tlajtoli, pero tlacame tlen tlanamiquij quimachilise nochi. 11Intla tipehua tijpohuas tonali quema nopa tlanahuatijquetl tlanahuatis ma ayoc quimacaca Toteco itlacajcahualis huan tlanahuatis ma quiquetzaca tlen nochi quiijiyase tiopan calijtic, elis seyoc 1290 tonali. 12Pero nelía se hueyi paquilistli quipantise tlen quichiyase huan tlaijiyohuise hasta quema panotos nochi 1335 tonali. 13Pero ta, tiDaniel, xijtlamilti moojhui nica huan teipa timosiyajcahuas, pero quema ajsis itlamiya tonali, timehuas huan tijselis tlen tijlantoc.’”